

**John Kôma**  
**CHONGPHUONG**  
**Chongmaruoi**

*John kôma Chongphuông* hih chu Khristien-geiin Jisua Khrista hi Pumapa ani tia taksônna an om sika nunuomloa an om lâitaka miziek ani. Amiziekpu'n akhîn tak chu aporepungei sabeina le mohôkna pêk rang le dûktongna le nunuomloa an om zorangeia khom taksônoma an om bang ranga ngên hi ani.

Hi lekhabua atam uol chu chongphuôngna jât tamtakngei le inlânangei málâia Khristien-geiin an riet theina ranga chong le rimila minlang ani, aniatachu mi dangngei ta rangin chu chonginthup ani. Miringhoi chonglupuingei ang-han hi lekhabu chonglupuingei hi inlânangei jât dadang mangin lam tamtakin avêl vêlin misîr ani. Hi lekhabu akipa rilsensâina chun-groia mindonlam dadang om ngâi khom re-sea, achonglupui tak; anúktaka chu Pathien'n Khrista, Pumapa jârin a râlngei murdi Soitan khom ânring rêngin mene let a ta, male hi motorna hih ânzoi tena chu a mi taksônongei chu invân thar le pilchung thar le satvurnangei leh râisânman a pêk ngei rang tih chu ânthâr ani.

*Asûnga chongtângpuingei*  
 Chongmaruoi 1:1-8

Inlârna mo-ongna le koiindang sari ngei kôm  
 lekhamuthuonngai 1:9—3:22

Lekhazuot le mohôr sari ngei 4:1—8:1  
 Bekul sari ngei 8:2—11:19  
 Dragon le Sarâng inik ngei 12:1—13:18  
 Inlârna dadangngei 14:1—15:8  
 Pathien taksina khuriâi sari ngei 16:1-21  
 Babylon sietminmangna, le sarâng menena,  
 dêipu dikloi le Diabol thurchi 17:1—20:10  
 Roijêkna azoina 20:11-15  
 Invân thar, pilchung thar, Jerusalem thar  
 21:1—22:5  
 Chongkhârna 22:6-21

<sup>1</sup> Hi lekhabu hih Jisua Khrista chongphuong, Pathien'n a tîrlâmngei min riet ranga a pêk, neinun hong tung kelen rang thurchi hah ani. Khrista'n ma chong ngei hi a vântîrton juongtîrin a tîrlâm John kôm a juong min rieta, <sup>2</sup> male John'n a mu murdi ngei hah a misîra. Mahi Pathien chong le Jisua Khrista'n chongtak a phuonga a misîrna ani. <sup>3</sup> Hi lekhabua ânziek porepu ngei, le asûnga lei rilmasana chongngei rangâia male ajômpu ngei chu satvur an ni! Hi neinunngei murdi tungna rang zora hih anâi zoi sikin.

*Koiindang sari ngei chibaimûknangei*

<sup>4</sup> John renga Asia ramhuol sûnga koiindang sari ngei kôm:

Pathien renga moroina le inngêina hah nin ta nirese, A om tit, A om sai le A la hong om rangpu, le a rêngsukmun makunga ratha sari ngei kôm renga, <sup>5</sup> male Jisua Khrista renga,

rietpuipu taksônom, thina renga inthoi masatak le rammuol rêngngei roijêkpu khom ani sa.

Ama'n mi lungkhama, male ama thina ân pêkna sikin ei sietnangei renga mirtan zoia, <sup>6</sup> male a Pathien le a Pa sintho rangin a Rêngrama ochaingeiin mi sin zoi. Jisua Khrista kôm han roiinpuina le sinthotheina tuonsôt tuonsôtin om rese! Amen.

<sup>7</sup> En roi, ama hih sômngai lâia khin a juong rang ani! Mitinin mûng an tih, ama lei sunngai khom mu sa an tih. Pilchunga mi murdi'n ama châ an tih. Ma angtak han nîng atih!

<sup>8</sup> “Keima hi amotontak le anûktak ki ni,” Pumapa Pathien Râtinchung, A om tit, A om sai le A la hong om rangpu han a ti.

### *Khrista inlârna*

<sup>9</sup> Keima John, nin lâibungpa, le Jisua nûkjûipu a Rêngram mingai chung a dûktongna hong tung, diertaka tuongna tienga nin champuipa ki ni, Pathien chong le Jisua'n chongtak a phuông thurchi ki misîrna sikin Patmos tuihuola intângin ko oma. <sup>10</sup> Pumapa nikhuo han Ratha'n ku chung a sin a thoa, male ku nûktieng rôl inringtak, bekul inring angin ki rieta. <sup>11</sup> Ma anghin a tia, “Neinun nu mu ngei hi miziek roh, male ma lekhabu hi khopuilien sari ngei sûnga koiindang sari ngei kôm muthuon ngei roh: Ephesus, Smyrna, Pergamum, Thyatira, Sardis, Philadelphia le Laodicea.”

---

**1:5** 1:5: Isa 55:4; Lap 89:27    **1:6** 1:6: Jôk 19:6; Chph 5:10    **1:7** 1:7: Dan 7:13; Mat 24:30; Mk 13:26; Luk 21:27; 1 Thes 4:17; Zak 12:10; Joh 19:34,37    **1:8** 1:8: Chph 22:13; Jôk 3:14

<sup>12</sup> Tumo mi rokôk en rangin ko hônheia anîn chu, rângkachak châtidarnagei sari ku mua, <sup>13</sup> male ma châtidarnagei lâia han munisi aphuozeke, a kephangei dênin kâcholiinchool a haka, a rôpa rângkachak kongkhit a khit ku mua. <sup>14</sup> A sam chu belrimul, aninônchu rodokang dôra çek, male a mitngei chu meichuong angati; <sup>15</sup> a kephangei chu sum-eng meikhura hâlminvâr le nôtmînvar angin aoma, a rôl miring chu tuitâk rasa angin ani. <sup>16</sup> A kut changtieng ârsi sari ngei a chôia, male a bâi renga khandai beniknei angaidak ahong suoka. A mâi chu sûnchimripa nisa râtlâitak angin ani. <sup>17</sup> Ama hah ku mu lehan, a kebula athi angin kên let raka. A kut changtieng ku chungâ minngamin, “Chi no roh! Keima hih amotontak le anûktak ki ni, a tia. <sup>18</sup> Keima hi aring hah ki ni! Ki thia, aniatachu atûn chu tuonsôta rangin ki ring nôk zoi ani. Thina chungâ le mithi khuo chungâ khom rachamneina ko dôn ani. <sup>19</sup> Hanchu, neinun nu mu ngei, atûna aom ngei le nûkka ahong om rang ngei hih miziek roh. <sup>20</sup> Ma hih ku kut changtiengâ ârsi sari nu mu ngei, le rângkachak châtidarna sari ngei omtie inthup chu an ni: ârsi sari ngei chu koiindang sari ngeia vântîrtonngei an nia, male châtidarna sari ngei chu koiindang sari ngei hah an ni.”

## 2

---

**1:13** 1:13: Dan 7:13; 10:5    **1:14** 1:14-15: Dan 7:9; 10:6    **1:15**  
 1:15: Ezek 1:24; 43:2    **1:17** 1:17: Isa 44:6; 48:12; Chph 2:8; 22:13

*Ephesus koiindang kôma chongmuthuon*

<sup>1</sup> Ephesus koiindanga vântîrton kôm hi anghin miziek roh:

“Hi chongmuthuon hih a kut changtienga ârsi sari ngei chôia, rângkachak châtidarna sari ngei lâia ânloi bang ngâipu renga ani. <sup>2</sup> Ni sinthongei murdi ki rieta; ni sin ranak songtie ngei le ni diertie ngei ki riet. Mi saloingei narngâi theiloi tie ngei le fîrton niloia fîrton inti ngei hah ni minsina, milak anni tih ni riet tih ki riet. <sup>3</sup> Ni diera, ki riming sikin nu tuonga, inzal mak che. <sup>4</sup> Aniatachu mahi nang ke demna ani: atûn hin chu motona anghan chu mi lungkham khâi mak che. <sup>5</sup> Kho tena ânlet mo na ni zoi mindon roh! Ni sietna renga inhei inla motona ni sintho hah tho nôk roh. Ni sietna renga nê n sîr nô nchu juong ka ta na châtidarna hah amun renga ki thînpai rang kêng. <sup>6</sup> Aniatachu ma hih na satna chu ani: Nicolaitangei sintho hah ke enjôtloi anghan ne enjôtloi sikin.

<sup>7</sup> “Hanchu, kuorngêi nin dônin chu, Ratha'n koiindangngêi kôm chong a ti ngei hih rangâi roi!

“Amenepu kai chu Pathien Ruhuona ringna thingkung linga om hah amara sâk rangin rachamneina pêk ki tih,” tiin.

*Smyrna koiindang kôma chongmuthuon*

<sup>8</sup> “Smyrna koiindanga vântîrton kôm hi anghin miziek roh:

“Hi chongmuthuon hi amotontak le anûktak, a thia hong ring nôkpu renga ani. <sup>9</sup> Nê n taknangei

murdi ki riet; nêñ rieng ti ki riet, aniatachu ne nei tatak! Juda tak niloia, Juda inti ngei neinun saloi nang an ti ngei hah ki riet; anni ngei hah Soitan pâla mi an ni! <sup>10</sup> Nu tuong rang ngei hi ite chi no roh. Rangâi roh! nin lâia mi senkhat intângna ina khumin Diabol'n nangni minsin a ta, male sôn sôm tena intaknangei tong nin tih. Thina dênin, keima rangin taksônomin om roh, male ne menena râisânman ringna rênglukhum nang pêk ki tih.

<sup>11</sup> "Hanchu, kuorngai nin dônin chu, Ratha'n koiindangngai kôm chong a ti ngei hi rangâi roi!  
"Amenepu ngei kai chu thi inikna han ite minna ngei thei no nih.

*Pergamum koiindang kôma chongmuthuon*

<sup>12</sup> "Pergamum koiindanga vântîrton kôm hi anghin miziek roh:

"Hi chongmuthuon hih khandai beniknei an-gaidak dônpu renga ani. <sup>13</sup> Khonmo no om, Soitan rêngsukmun omna hah ki riet. Ki riming nu sôr mindet tita, male ki rietpuipu taksônôm, Antipas Soitan omna muna an that lâihan khom ku chung a na taksônômna hih mâk mak che.

<sup>14</sup> Aniatachu neinunngai alekti chung a demna nang ko dôn: nin lâia mi senkhatin Balaam minchuna chong an pom sikin. Ha mi han mirmilngai bieknâ neinun an pêk ngei hah an sâknâ rang le inditnasaloi an songna rangin Balak hah Israel mingai sietna tieng tipuiraiâ minjôtna chang a minchu ani. <sup>15</sup> Ma angdên

---

**2:11** 2:11: Chph 20:14; 21:8    **2:14** 2:14: Tel 22:5,7; 31:16; Bal 23:4; Tel 25:1-3

han Nicolaitangei minchuna chong jûipungei nin lâia no dôn ani. <sup>16</sup> Atûn ni sietnagei renga inhei roh! Nêh heî nônchu, no kôm juong lai ka ta, ka bâia hong jôk khandai ngâi lehan ha mingei hah ku juong doi rang kêng.

<sup>17</sup> “Hanchu, kuorngai nin dônin chu, Ratha'n koiindangei kôm chong a ti ngei hih rangâi roi!

“Amenepu ngei kai chu manna inthup senkhat ngei pêk ki tih. Lung ngoi achunga riming thar ânziek a changpu ti nônchu tutên an riet ngâi loi hah khom pêk ngei chit ki tih.

*Thyatira koiindang kôma chongmuthuon*

<sup>18</sup> “Thyatira koiindanga vântîrton kôm hi anghin miziek roh:

“Hi chongmuthuon hih Pathien Nâipasal, a mitngei mei anga chuong, a kephangei sum-eng anga nôtmînvar renga han. <sup>19</sup> Imo no tho ki riet. Nu lungkhamna, na taksônomna, ni sinthongei, le ni diertie ngei ki riet. Motona nêkin atûn hin sin no tho uol ti khom ki riet. <sup>20</sup> Aniatachu ma hih nang ke demna chu ani: nupang Jezebel, Pathien thangtheipu inti ngâinu hah na rangâi thei sikin. Amanu han ki tîrlâmngai inditnasaloi tho minchûn le mirmilngai kôma neinun an pêk ngei sâk rang minchûn aletiang a ruoi ngei ngâi. <sup>21</sup> Amanu hah a sietnagei renga insîr rang zora ke pêka, aniatachu amanu han a hurna renga inhei nuom mak. <sup>22</sup> Masikin natna jâlmuna pai ka ta, ânrepui ngâi ngei khom asaloi neinunngai

---

**2:17** 2:17: Jôk 16:14,15; 16:33,34; Joh 6:48-50; Isa 62:2; 65:15

**2:20** 2:20: 1 Rêng 16:31; 2 Rêng 9:22,30

an thona renga an insîr nôncu atûn dûktongna chi omtaka pai ngei sâng ki tih. <sup>23</sup> Amanu nûkjûngei khom that pe ka ta, hanchu keima hi mulungrîngei le mindonnangei riet ngâipu ki ni ti koiindangei murdi'n riet an tih. Nin mijôn chita nin sintho dungjûiin nangni pêk ki tih.

<sup>24</sup> “Aninâka nangni Thyatira sûnga omngei kai hi minchuna saloi jûi loa; ‘Soitan chonginthupngei inthûk’ mi dangngeiin an ti inchu loi ngei chungu chu puokrik dang ite nangni bôk pe no ning ki ti ani. <sup>25</sup> Aniatachu, ku juong mâka chu, nin dônsai hah nin mutu mindet ngêt rang ani. <sup>26-28</sup> Amenepu ngei kai, among dêna ku lungdo sin ngei chu, ka Pa renga rachamneina ka man dên hah pêk ki tih: jâtin chungu thîr tôkmol le roijêka pil bêlungei anga ahârhâra tôkkhoi chit rangin rachamneina pêk ngei sa ki tih. Jîng sikhovâr khom pêk ngei sâng ki tih.

<sup>29</sup> “Hanchu, kuorngei nin dônin chu, Ratha'n koiindangei kôm chong a ti ngei hih rangâi roi!

### 3

#### *Sardis koiindang kôma chongmuthuon*

<sup>1</sup> “Sardis koiindanga vânfîrton kôm hi anghin miziek roh:

“Hi chongmuthuon hih Pathien ratha sari ngei le ârsi sari ngei dônpu han a misîr ani. Ni sinthongei murdi ki riet; thi chienin aring riming nu ruput ani! <sup>2</sup> Masikin inthoi inla, na la dônte athi vavâng hah a thi let mân min rât roh.



Ni sinthongei murdi hih ka Pathien mitmua la chukphar mak ti ki riet. <sup>3</sup> Hanchu minchua no om le ni riet ngei hah rieltit inla; jôm inla ni sietnagei renga inhei roh. Na har nôncu, inru angin no kôm juong ka ta, male khotik zora mo ku juong rang luo riet no ti nih. <sup>4</sup> Hannirese mi tômte Sardis taka han nin puonngei ânthiengin nin dara. Puon ngoi insilin, keima leh munkhatin lôn nin ta, ma anga tho rang piela ânhoi nin ni sikin. <sup>5</sup> Amenepu ngei kai chu ma anghan puon ngoi insil an ta, male ringna lekhabu renga an rimingngei pai no ning. Ka Pa le vântîrtongei makunga anni ngei hah ka ta an ni tiin ânthârlakin ku phuong rang ani.

<sup>6</sup> “Hanchu, kuorngei nin dônin chu, Ratha'n koiindang ngei kôm chong a ti ngei hih rangâi roi!

*Philadelphia koiindang kôma chongmuthuon*

<sup>7</sup> “Philadelphia koiindanga vântîrton kôm hi anghin mizieik roh:

“Hi chongmuthuon hih mi inthiengtak le diket renga ani. Ama hah David chabi dôn, male inkhâr a mo onga anîn chu tutên khâr thei mak ngeia, male a khâra anîn chu tutên mo ong thei mak ngei ani. <sup>8</sup> Ni sintho murdi ki riet: Sinthotheina likti no dôn tih ki riet; ki minchuna nu jûia male keima rangin taksôn no oma. Na makunga inkhâr ko mo onga maha tutên khâr thei noni ngei ani. <sup>9</sup> Rangâi ta!

---

**3:3** 3:3: Mat 24:43-44; Luk 12:39-40; Chph 16:15    **3:5** 3:5: Jôk 32:32-33; Lap 69:28; Chph 20:12; Mat 10:32; Luk 12:8    **3:7** 3:7: Isa 22:22; Job 12:14

Soitan pâla mi senkhatngei, Juda niloia, milak thoa Juda inti ngei ha hongfîr ka ta, ne ke bula chubai nang hong min mûk ki tih. Nang ku lungkham tiin anrêngin riet an tih. <sup>10</sup> Diernân ko chongpêk no jôm sikin, pilchunga mingei minsin ranga rammuol pumpui chung a misinna intakna zora juong tung rang renga khom nang mojok ki tih. <sup>11</sup> Ku juong lai rang kêng ani zoi. ne neinun dôn hah hôih roh, masikin tutên ne menena râisânman ha nang an sut lolina rangin. <sup>12</sup> Amenepu ngei kai chu ka Pathien biekina chopuiin sin ka ta, male anni ngei han maha mâk khâi noni ngei. An chung a han ka Pathien riming le ka Pathien khopuilien riming, Jerusalem thar, invâna Pathien renga ajuong chum rang ani. Ki riming thar khom an chung a miziek sâng ki tih. <sup>13</sup> “Hanchu, kuorngei nin dônin chu, Ratha'n koiindangngei kôm chong a ti ngei hih rangâi roi!

*Laodicea koiindang kôma chongmuthuon*

<sup>14</sup> “Laodicea koiindanga vântîrton kôm hi anghin miziek roh:

“Hi chongmuthuon hi Amen renga, taksônontak le rietpuipu diktak, Pathien neinun sin ngei murdi bulpui\* han a misîr ani. <sup>15</sup> Ni sintho murdi ki riet; adâi khom nimak che alum khom nimak che ti ki riet. Na dâiin nom, nu lumin nom ku nuom ani! <sup>16</sup> Lum takloi, dâi takloiin, nu lumchichil sikin ka bâu renga nang michil pai ki tih! <sup>17</sup> ‘Ke nei,

---

**3:9** 3:9: Isa 49:23; 60:14; Isa 43:4    **3:12** 3:12: Chph 21:2Isa 62:2; 65:15    **3:14** 3:14: Chvr 8:22    \* **3:14** 3:14: bulpui; aninônchu roijêkpu.

neinunsampâr ko dôn; ka nâng murdi ko dôn zoi' ni tia. Aniatachu nangman idôra ngâsietom le inriengom mo na ni inriet mak che! nên rieng, dierkaiboi, le mitcho ni nih. <sup>18</sup> Hanchu, ne nei theina rangin ko kôm rângkachak rochôk roh, rângkachak inthienghie. Dierkaiboi inzakpuiom nên thomna rang le nên sil rang puon ngoi rochôk sa roh. Nu mu theina rangin mitnaloi nu buok rang khom rochôk sa rangin nang ki ril ani. <sup>19</sup> Ku lungkham ngei ngân chu ko ngoa ke sep ngâi. Ningsiet inla male ni sietnagei renga inhei roh. <sup>20</sup> Rangâi ta! mokota indingin inkhâr ko tok hih; tukhomin ko rôl an rieta male inkhâr an mo-ongin chu, insûnga juong ka ta anni ngei leh munkhatin bunêk ki tih, male anni khom keima leh nêk sa an tih. <sup>21</sup> Amenepu ngei kai chu ke rêngsukmun kôla min sung ki tih, kei khom ke menea ka Pa rêngsukmun kôla atûna kên sung anghin.

<sup>22</sup> “Hanchu, kuorngei nin dônin chu, Ratha'n koiindangnei kôm chong a ti ngei hi rangâi roi!”

## 4

### *Invâna Pathien chubaimûkna*

<sup>1</sup> Masuole chu inlârna dang ku mua, ko hong ena, invân inkhâr in-ong ku mua. Male bekul miring angati rôl ki riet masa han ni chongpui, “Hin hong inla, hima suole neinun hong om ngêt rang ngei nang min mu ki tih,” a tia. <sup>2</sup> Voikhatrengin Ratha'n mi ompuia. Invân khin rêngsukmun le a

chung a mi inkhat ânsung ahong oma. <sup>3</sup> A mâi hah jasper le carnelian lungmantam angin ânlanga, male rêngsukmun rihîla han sũminsâng emerald lung rông anghan ânjâm sa. <sup>4</sup> Rêngsukmun rihîla han rêngsukmunngêi adang sômnikminli an om sa, ma rêngsukmunngêia han upa sômnikminli ngei puon ngoi an insila, rângkachak rênglukhumngêi inkhumin an insunga. <sup>5</sup> Rêngsukmun renga han kôlinleka dapdappinge, khuonri rahangngêi le mechêk puok rahangngêi ahong oma. Rêngsukmun motona han châti sari ngei mochokin aoma, mangei hah Pathien ratha sari ngei hah an ni. <sup>6</sup> Rêngsukmun moton nanâk han crystal lung anga vâv lîm-en tuikhanglien angati khom aom sa.

Rêngsukmun rihîlin kângkhat tieng khom, kângkhat tieng khom iring parânngêi minli motontiang le nũktieng amit sipmat an oma. <sup>7</sup> Iring inkhatna hah chu ikeibaknei aphuo; inikna chu serâtchal aphuo, inthumna chu a mâi hah munisi mâi aphuo; male minlina chu minmu vuonglâi aphuo ani. <sup>8</sup> Ma iring parân minli ngei hah manthangei uruk an dôn paka, male anni ngei hah amit sipmat an nia, sũngtieng le pêngtieng khom. Sûn le jân inngam loiin lâ an thoa:

“Anthieng, ânthieng, ânthieng, Pumapa Pathien Râtinchung,

---

**4:2** 4:2-3: Ezek 1:26-28; 10:1      **4:5** 4:5: Jôk 19:16; Chph 8:5; 11:19; 16:18Ezek 1:13; Chph 1:4; Zak 4:2      **4:6** 4:6: Ezek 1:22  
**4:6** 4:6,7: Ezek 1:5-10; 10:14      **4:8** 4:8: Ezek 1:18; 10:12Isa 6:2-3

A om sai, a omtit, le a la hong om rangpu chu.”

<sup>9</sup> Iring parân minli ngei han rêngsukmuna ânsung ngâipu tuonsôt tuonsôta ring tit kôm han roiinpuina, miritna le minpâkna lângei an thoa. Ma anga an tho racham han, <sup>10</sup> upa sômnikminli ngei han rêngsukmuna ânsungpu makunga inbokin tuonsôt tuonsôta ring titpu chubai an mûka. An rênglukhumngei hah rêngsukmun motona an dara:

<sup>11</sup> “Kin Pumapa le kin Pathien! nangma chu roiinpuina, miritna, le sinthotheina man ruopiel ni ni.

Neinunngei murdi nangman na sina,  
male nu lungdoa om le ringna pêk an ni.”

## 5

### *Lekhazuot le Belrite*

<sup>1</sup> Rêngsukmuna ânsung ngâipu kut changtieng han lekhazuot ku mua; maha kângnika ânziek mohôr sari ngei mohôr ânnam leta ânthom ani.

<sup>2</sup> Vântûrton râtak ku mua, rôl inringtakin, “Tu mo aminpipna mo-onga, lekhazuot ha aphar thei rang ni zoi?” tiin tânghâi ku mu sa. <sup>3</sup> Aniatachu invâna, pilchunga aninônchu rammuol nuoia\*

khom tute lekhazuot mo-onga asûnga a en thei rang reng om mak ngei. <sup>4</sup> Lekhazuot hah a mo-onga, asûnga a en theiruo tute an om loi sikin ka chap ngungûia. <sup>5</sup> Hanchu upangei lâia inkhatin ko kôm, “Chap no roh. En roh! Juda jâta

---

**5:1** 5:1: Ezek 2:9-10; Isa 29:11  
Thina rammuol (1:18 en roh).

\* **5:3** 5:3: rammuol nuoia:

ikeibaknei, David richisuonpâra roiinpui han, a menea, male ama han aminpipna sari ngei hah akheka lekhazuot hah a mo-ong thei zoi,” a tia.

<sup>6</sup> Hanchu Belrite hah rêngsukmun alâitak han ânding ku mua, iring parân minli ngei le up-angei hah arihîla an om ani. Belrite that sai anghan ânlanga. Maha rikingei sari le mitngei sari a dôna, ma ngei hah Pathien ratha sari ngei pilchung pumpuia tîra om ngei hah an ni.

<sup>7</sup> Belrite hah a sea male rêngsukmuna ânsung ngâipu kut changtieng renga lekhazuot hah ava lâk zoia. <sup>8</sup> Ma anghan a thoa anîn chu, iring parân minli ngei le upa sômnikleiminli ngei han serânda le rângkachak khuriâingei mirimhoia sip chôl pakin Belrite makunga han an inboka, ma ngei hah Pathien mingei chubaithonangei ani. <sup>9</sup> Anni ngei han lâ thar an thoa:

“Nangma chu lekhazuot lâk theiruo

le a minpipnangei kheka mo-ong thei ni ni.

Thatin no oma, male thina nên pêkna han Pathien ta rangin

jâttina mingei, chongtina mingei, namtina mingei le ruitina mingei no rochôk zoi.

<sup>10</sup> Kin Pathien sintho rangin rêngrama ochaingei ni sin ngei zoi ani,

male anni ngei han pilchunga roijêk an tih.”

<sup>11</sup> Ko hong en nôka, male vântirtonngei rôl ki rieta, isâng tamtak le isângrazasôm tamtak an ni! rêngsukmun rihîla han an indinga, iring parân

---

**5:5** 5:5: Aph 49:9Isa 11:1,10    **5:6** 5:6: Isa 53:7; Zak 4:10    **5:8** 5:8; Lap 141:2    **5:9** 5:9: Lap 33:3; 98:1; Isa 42:10    **5:10** 5:10: Jók 19:6; Chph 1:6

minli ngei le upangei khom an om sa, <sup>12</sup> male rôl inringtakin lâ an thoa:

“Belrite thata omsai hih  
 sinthotheina, neinunsampâr, vârna le râtna,  
 miritna, roiinpuina le minpâkna man  
 theiruo piel ani!”

<sup>13</sup> Male invâna, pilchunga, rammuol nuoia,  
 le tuikhanglien sũaga iring parângei murdi  
 vânnuoia iring murdi ngei le lâ an thoa:

“Rêngsukmuna ânsung ngâipu le Belrite kôm  
 han,  
 minpâkna le miritna, roiinpuina le  
 sinthotheina ngei,  
 tuonsôt tuonsôtin om rese!”

<sup>14</sup> Iring parân minli ngei han, “Amen!” tiin an  
 thuona, male upangei han inbokin chubai an  
 mûk zoi.

## 6

### *Mohôrngei*

<sup>1</sup> Hanchu Belrite han mohôr sari ngei lâia  
 inkhat changna hah a mo-ong lâi ku mua, male  
 iring parân minli ngei lâia inkhat han a rôl  
 khuonri ang dôrin, “Hong roh!” a ti ki rieta.

<sup>2</sup> Ko hong ena male mahan sakor ngoi ku mua.  
 Achunga chuongpu han thalsâili a chôia, male  
 ama hah rênglukhum pêkin aoma. Amenepu'n  
 mene rang angin a jôkpai zoi.

<sup>3</sup> Hanchu Belrite han mohôr inikna a mo-onga;  
 male iring parân inikna han, “Hong roh!” ti  
 ki rieta. <sup>4</sup> Sakor dang asen inkhat ahong jôka.

Achunga chuongpu kôm han miriemngei inkhat le inkhat an inthat inlôma pilchunga râl ahong suok theina rangin ranak an pêka. Ama hah khandai lienpa khom an pêk sa ani.

<sup>5</sup> Hanchu Belrite han mohôr inthumna a monga; male iring parân inthumna ngei han, “Hong roh!” an ti ki rieta. Ko hong enin chu mahan sakor hâng aoma. Achunga chuongpu han pharla a kuta achôia. <sup>6</sup> iring parân minli ngei lâi renga rôl rahang angin, “Sukloibu tabong khat sônkhath rathaman, male barley tabong thum sônkhath rathaman. Aniatachu olive thingkunggei le theibilngei chu siet no roh!” ti ki riet.

<sup>7</sup> Hanchu Belrite han mohôr minlina a monga; male iring parân minlina renga, “Hong roh!” ti rôl ki rieta. <sup>8</sup> Ke enin chu, mahan sakor arông adôngzat ku mua. Achunga chuongpu riming hah Thina ania, male Mithi khuon\* anûk ajûi sa ani. Anni ngei hah pilchung hi phalminlin semin phalkhat chungarâlin, mâitâmin, ri-ngei le ram sângeiin that rangin rachamneina pêkin an om ani.

<sup>9</sup> Hanchu Belrite han mohôr rangngana a monga. Pathien chong an misîr sika le Pathien rietpuipu an nina tienga taksônoma an om sika thata omngei ratha ha mâichâm nuoia ku mu ngei ani. <sup>10</sup> Anni ngei han rôl inringtakin, “Râtinchung Pumapa, ânthieng le adik! Idôr sôt mo pilchung mingei chungaroijêk loiin le mi

---

**6:4** 6:4: Zak 1:8; 6:2    **6:5** 6:5: Zak 6:2,6    \* **6:8** 6:8: mârsi: Thina rammol (1:18 en roh).    **6:8** 6:8: Ezek 14:21



thatngei dūk tho loiin no om rang?” tiin an inieka. <sup>11</sup> Anni ngei hah puon ngoi an pêk ngei paka, tirlâmngei le iempungei adang thata an lei om angdêna om rang ngei hah, an mijôn akip mâka chu la ngâktet rangin an rila.

<sup>12</sup> Male Belrite han mohôr urukna a monga. Mahan ningnu râtak ahonga, male nisa hah thoilapuon ahâng angin ahong hângjêta, male thâ khom thisen angin ahong sen zoi ani. <sup>13</sup> Phâivuopuiin theichang kung anoknôia amara aselngei amathâkril anghan, invânlâia ârsingei ha pilchunga an tâk suo zoi. <sup>14</sup> Invân hah lekhazuot angin ânzuota ân mangpai zoi, male muolngei le tuihuolngei murdi hah an omna renga thînpaiin an om zoi. <sup>15</sup> Hanchu pilchunga rêngngei, roijêkpungei, râلمي uliengei, mineingei le ranak dônngei, le midangngei murdi, suok le zalennggei murdi muolchungngeia rôlkuogeia, le lungnuoinggeia an inthupa. <sup>16</sup> Muolngei le lungpuinggei kôm han, “Mi del ungla, rêngsukmuna âsung ngâipu mitngei renga le Belrite taksina renga mi thup roi! <sup>17</sup> An taksina nikhuo chiomtak ahong tung zoi, male tumo adoi rangin ânding thei ranga?” tiin an koisama.

## 7

### *Israel mingei 144,000*

---

**6:12** 6:12: Chph 11:13; 16:18; Isa 13:10; Joel 2:10,31; 3:15; Mat 24:29; Mk 13:24,25; Luk 21:25    **6:13** 6:13,14: Isa 34:4    **6:14** 6:14: Chph 16:20    **6:15** 6:15: Isa 2:19,21    **6:16** 6:16: Hos 10:8; Luk 23:30    **6:17** 6:17: Joel 2:11; Mal 3:2

1 Masuole chu, pilchunga le tuikhangliena aninônchu thingkungngei murdia pháivuo arâng khâi lolina rangin pháivuo sùra pilchung rikil minlia an inding vântûrton minli ngei hah ku mua. 2 Male vântûrton dang Pathien ring mohôr ânnam nisuotieng renga ahong suok ku mua. Ama'n rôl inringtakin vântûrton minli ngei Pathien'n pilchung le tuikhanglien siet theina racham a pêk ngeia a koisam ngeia. 3 Vântûrton han, “Ei Pathien tîrlâmngei an machalngeia mohôr ei nam mâka chu pilchung, tuikhanglien le thingkungngei hih la siet hi no roh,” a tia. 4 Male an machalngeia Pathien mohôr nama om ngei mijôn hah rilin ko oma, anni ngei hah 144,000 an ni. Anni ngei hah Israel jât sômleinik ngei renga an nia, 5-8 mohôr nâma om ngei chu ajât zeta isâng sômleinik an nia: Judah, Reuben, Gad, Asher, Naphtali, Manasseh, Simeon, Levi, Issachar, Zebulun, Joseph, le Benjamin.

### *Loko tamsabakngei*

9 Masuole chu ko hong ena, male mahan loko tamsabakngei an oma mipui tamtie chu tutên telsuoloi dôr an ni! Anni ngei hah namtina mingei, jâtina mingei, chitina mingei, le chongtina mingei puon ngoia invôn an kutngeia lepâibuongei chôiin rêngsukmun le Belrite makunga an inding ku mua. 10 Anni ngei han rôl inringtakin, “Sanminringna hih ei Pathien, rêngsukmuna insungpu le Belrite renga hong kêng ani!” tiin an inieka. 11 Vântûrtonngei murdi

hah rêngsukmun, upangei le iring parân minli ngei rihîla han an indinga. Hanchu anni nanâkin rêngsukmun motona han an mâi nuoi mintônin an inboka Pathien chubai an mûka, <sup>12</sup> “Amen! Minpâkna, roiinpuina, vârna, râisânchongrilna, miritna, râtna, le sinthotheina ngei chu tuonsôt tuonsôtin Pathien ta ani! Amen!” an tia.

<sup>13</sup> Upangei lâia inkhatin ko kôm, “Hi puon ngoia invongei hi tu ngei mo an ni, kho renga hong mo an ni?” tiin ni rekela.

<sup>14</sup> “Pu, riet mu-ung. Nangman kêng ni riet” tiin ku thuona.

Ama'n ko kôm, “Hi mingei hih nunuomlona chiomtak renga jôkriema hong ngei hah an ni. Anni ngei hih an puonngai Belrite thisen leh rusûkminsâia ânthiengsai ngei hah an ni. <sup>15</sup> Masika han, Pathien rêngsukmun motona indingin sîn le jân a biekina ama sin an tho ngâi ani. rêngsukmuna insung ngâipu han anni ngei hah amakunga rung ngei atih. <sup>16</sup> An vonchâm tet khâi no nia, an tui khom inrâl tet khâi no ni; nisa lum khomin kâng ngei khâi no nia, alum dadang khomin kâng ngei khâi no ni, <sup>17</sup> asikchu Belrite rêngsukmun alâitaka insungpu hih anni ngei Belrihólpu nîng a ta, male ama'n ringna tuikuongngeia han ruoi ngei atih. Male Pathien'n an mitngei renga mitrithingei murdi hûiminsâi pe ngei atih.”

---

**7:14** 7:14: Dan 12:1; Mat 24:21; Mk 13:19    **7:16** 7:16: Isa 49:10

**7:17** 7:17: Lap 23:1; Ezek 34:23; Lap 23:2; Isa 49:10; 25:8

## 8

*Mohôr sarina*

<sup>1</sup> Belrite han mohôr sarina hah a mo-ong lehan konta in-ang dôr chu invân ânthim ngânga. <sup>2</sup> Hanchu vântîrton sari Pathien makunga in-ding ngâi ngei hah ku mua, male an kôm bekul sari an pêk ngeia. <sup>3</sup> Vântîrton dang a hong, rângkachak mirimhoi hâlna kolla chôiin mâichâm kôla ândinga. Ama hah Pathien mingei murdi chubaithonangei le molopa rêngsukmun motona rângkachak mâichâm chung a pêk rangin mirimhoi tamtak an pêka. <sup>4</sup> Mirimhoi khu hah Pathien mingei chubaithonangei le vântîrton Pathien motona indingpu kutngei renga akal zoi ani. <sup>5</sup> Hanchu vântîrton han mirimhoi hâlna kolla hah a lâka, mâichâm renga mei le a minsipa, male pilchunga a vôrpaia. Ma han khuonringei le mechêk puok rahangngei, kôlinleka dadaptingei le ningnungei ahong oma.

*Bekulngei*

<sup>6</sup> Hanchu vântîrtonngei sari bekul sari chôi ngei hah tum rangin an inthoka. <sup>7</sup> Vântîrton inkhatna han a bekul a tuma. Iriel le mei, thisen leh inpol ahong oma, pilchunga bun paiin aom zoi. Pilchung munthuma semin munkhat chu akânga, thingkungngei khom munthuma semin munkhat chu akânga, sûlringngei murdi khom akâng sa zoi.

---

**8:3** 8:3: Amos 9:1; Jôk 30:1,3      **8:5** 8:5: Och 16:12; Ezek 10:2; Jôk 19:16; Chph 11:19; 16:18      **8:7** 8:7: Jôk 9:23-25; Ezek 38:22

<sup>8</sup> Hanchu vântîrton inikna han a bekul a tuma. Muol lienpa meiin akâng lâitak angati tuikhagliena vârpaiin aoma. Tuikhaglien ha munthuma semin munkhat chu thisen achang zoia, <sup>9</sup> tuikhagliena iring parân munthuma semin munkhat chu an thia, male rukuongngei khom munthuma semin munkhat chu asiet sa zoi.

<sup>10</sup> Hanchu vântîrton inthumna han a bekul a tuma. Ârsi lienpa, meiser anga chuông, invân renga juông mathâkin tuidungngei le tuinârngei munthuma semin munkhat chung a atâka. <sup>11</sup> (Ha ârsi riming hah “Akhana,” ani). Tui munthuma semin munkhat chu ahong kha zoia, male tui hah ahong kha zoi sikin, mi tamtak chu ma tui hah nêkin an thi zoi.

<sup>12</sup> Hanchu vântîrton minlina han a bekul a tuma. Nisa munthuma semin munkhat, thâ munthuma semin munkhat, le ârsingei munthuma semin munkhat chu dêngkhoin an oma, ma ngei vâh hah munthuma semin munkhat ajîng theina rangin; sùn le jân khom munthuma semin munkhat chu vâh om khâi mak.

<sup>13</sup> Hanchu ko hong ena, minmupui vânlâijôla insângtaka vuongin rôl inringtakin, “Vântîrton dang inthum ngei bekul la hong tum ngêt rang miring hong om rang renga pilchunga omngei chung a idôr mo la hong intak ta ni! O ântak! ântak!” ti ki riet.

## 9

<sup>1</sup> Hanchu vântîrton rangngana han a bekul a tuma. Invân renga ârsi pilchunga atâk ku mua, male a kôm han khurmongboi chabi an pêka.\*

<sup>2</sup> Ârsi han khurmongboi hah a mo-onga, meikhur lienpa renga meikhu angin khurmongboi renga han meikhu ahong suoka; khurmongboi renga meikhu han nisavâr le invânlâi amin thim zoi.

<sup>3</sup> Meikhu renga han khâingei pilchunga an juong tâka, male ainuvetngei sinthotheina an dôn angtakin anni ngei hah sinthotheina pêkin an om ani.

<sup>4</sup> Anni ngei hah pilchunga sûlungei, thingkungngei aninônchu sûlring dadangngei chu siet loiin; an machalngeia Pathien mohôr ânnam loi miriemngei vai hah siet rangin an ril ngeia.

<sup>5</sup> Khâingei hah hi mingei hih that rangin chu phal nimak ngeia, tha rangnga sûnga dũkmintong ngei rangin vai kêng phalna an pêka. Dũkmintongna anatie chu ainuvetin mi abela, ana ngâi angin ani.

<sup>6</sup> Ma tha rangnga sûngha chu thina zong an ta, aniatachu, man no ni ngei; anni ngei han thi rang nuom an ta, aniatachu thina hah anni ngei renga rotpai atih.

<sup>7</sup> Khâingei hah sakorngei râlbuola se ranga ânthok ngei kêng an phuo; an lungeia han rângkachak rênglukhumngei phuozeke an khuma, an mângiei hah munisi mângiei kêng an phuo.

<sup>8</sup> An samngei hah nupang sam kêng

---

\* **9:1** 9:1: Khurmongboi: Ramkhoringei azoinataka an dũktongna ahong om mâka intânga an omna mun pilchung nuoi inthũktakngei. **9:2** 9:2: Aph 19:28 **9:3** 9:3: Jôk 10:12-15

**9:4** 9:4: Ezek 9:4 **9:6** 9:6: Job 3:21; Jer 8:3 **9:7** 9:7: Joel 2:4

aphuo, an hângei hah ikeibaknei hâ kêng aphuo. <sup>9</sup> An rôpngei hah thîr rôpphongeï le thom kêng an phuo, male an manthangei rahang hah sakor tamtak râlbûol pana sakorin bêlkaringei an kai rahang aphuo ani. <sup>10</sup> Anni ngei hah ainuvet angin remeingei le beltheinangei an dôna, male an remeingei leh tha rangnga sũa mingei minna theina sinthotheina an dôni. <sup>11</sup> Khurmongboi enkolpu vântîrton hah an chungâ roijêk rangin rêngin an dôni. A riming hah Hebrew chongin chu Abaddon ania; Greek rimingin chu Apollyon ania (aomzie chu "Asietpu" tina ani).

<sup>12</sup> Intakna inkhatna chu avun zoi; masuale hin intak oulnangei inik ahong tung rang ala om. <sup>13</sup> Hanchu vântîrton urukna han a bekul a tuma. Pathien motona rângkachak mâichâm ânding rikil minli ngei renga han rôl ki rieta. <sup>14</sup> Rôl han bekul dônpu vântîrton urukna kôm, "Euphrates tuidung roiinpua vântîrton minli khita omngei ha mojôk ngei roh!" a tia. <sup>15</sup> Hi dârkâr, hi sũa, hi thâ le hi kum ranga inthok-sai vântîrtonngei minli hah munisingei murdi munthuma semin munkhat that rangin an mojôk ngei zoia. <sup>16</sup> Râlmingei sakor chungâ chuong ngei hah an mijôn tamtie chu million razannik an ni ti rilin ko om ani. <sup>17</sup> Male inlârna han sakorngeni le an chungâ chuongngei ku mua: rôpphongeï mei anga sen, sapphire anga dum le sulphur anga eng an dôna. Sakor lungeni hah ikeibakneingei lu aphuo, male an bângei renga

han mei, meikhu le sulphur ngei ahong suoka.  
<sup>18</sup> Ha dûk thona inthum ngei: mei, meikhu le sulphur ngei sakornei bângei renga hong suok han munisingei munthuma semin munkhat chu an that zoi. <sup>19</sup> Sakornei sinthotheina hah an bângeia le an remeingeia han aoma. An remeingei hah murûngei, lu dôn angin ania, male mangei hah mangin mi an minna ngâi ani.  
<sup>20</sup> Munisi ngei hah dûk thona taka that suoloi ngei hah an kuta an sinngai renga inhei uol mak ngei. Ramkhorngai, rângkachak mirmilngai, sumtak mirmilngai, sumdâr mirmilngai, lung mirmilngai, thing mirmilngai, ite mu theiloi, ite riet theiloi le lôn theiloi biek hah mong uol mak ngei. <sup>21</sup> An mi thatngai, an dôl mang ngei, inditnasaloi an thongei, aninônchu inru an thongei renga khom insîr uol mak ngei.

## 10

### *Vântîrton le lekhazuot te*

<sup>1</sup> Hanchu vântîrton râtak dang invân renga juong chum ku mua. Ama hah sôm leh ân pholoma, a lua sûminsâng ânjâma; a mâi hah nisa angin aoma, male a kengei hah mei lung-chopuingei angin aoma. <sup>2</sup> A kuta han lekhazuot chînte pharsai a choia. A ke chang tieng tuikhangliena a sira, a ke voi tieng tânga a sira, <sup>3</sup> male ikeibakneingei an inrâm angin rôl inringtakin ân ieka. Ân iek suole chu mechêk sari ngei hong inringin an thuona. <sup>4</sup> Mechêk sari



ngei an hong chong lehan, miziek rang ko bôka. Aniatachu, “Mechêk sari ngei chong an ti hah ip tit roh; miziek no roh!” tiin invân renga ahong chong rôl ki rieta.

<sup>5</sup> Hanchu vântîrton tuikhanglien le tânga ânding ku mupu han a kut chang tieng invân tieng a phara <sup>6</sup> invân, pilchung le tuikhanglien male an sûnga omngei murdi sinpu Pathien tuonsôt tuonsôta om titpu rimingin khomâkinsâmin, “Mahan innuna rang reng om khâi noni! Vântîrtonin a tia. <sup>7</sup> Aniatachu vântîrton sarina han a bekul a tum tena chu Pathien'n a mintuo inthup hah mikhîp atih zoi, a tîrlâmngei, dêipungei kôma thurchi sa a lei phuong anghan.”

<sup>8</sup> Hanchu invân renga hong chong rôl ki riet han mo rokôk nôka, “Tuikhanglien le tânga ânding vântîrton kuta lekhazuot pharsaia om so sên la va lâk roh,” a tia.

<sup>9</sup> Vântîrton kôm han ke sea male lekhazuot te hah ni pêk rangin ke ngêna. Ama han ko kôm, “Lâk inla male sâk roh; no von sûnga han hong thûr a ta, aniatachu na bâi sûnga han khuoilutui anghan hong thum atih,” a tia.

<sup>10</sup> Lekhazuot te hah vântîrton kut renga ka lâka male ka sâka, male ka bâi sûnga khuoilutui angin athuma. Aninâka ke melem suole chu ko von sûnga han ahong thûr zoia. <sup>11</sup> Hanchu “Namtingei, chitinningei, chongtingei le rêngngei tamtak kôm Pathien chong vêlkhat na la misîr nôk ngêt rang tiin rilin ko om ani.”

# 11

## *Rietpuipungei inik*

<sup>1</sup> Hanchu tôkmol minkhina rotuon angati pêkin ko oma, “Sênla Pathien biekin le mâichâm hah va minkhi inla, asûnga Pathien chubaimûkpu ngei khom tel sa roh, tiin rilin ko oma. <sup>2</sup> Biekin khalâi pêngtieng ngei ha chu minkhi no roh, anni ngei hah chu sonongngei (chidang jât dangngei) kôm pêk ani zoi sikin, Khopuilien Inthieng chungga tha sômminlileinik sirdên rangpu ngei ha. <sup>3</sup> Ki rietpuipungei inik thoilapuon insilin tîr ka ta, male sún isâng khat razannik sômruk sûng han Pathien chong misîr an tih.”

<sup>4</sup> Ha rietpuipungei inik pilchung Pumapa motona ânding ngei hah olive thingkungngei inik le châtidarnangei inik hah an ni. <sup>5</sup> Tumakhatin anni ngei hah minna rang an pûtin chu an bânggei renga mei ahong jôka an râlnegei hah akâng minmang ngâi; ma angdên han tukhomin anni ngei hah minna rang an pûtin chu thatin om an tih. <sup>6</sup> Anni ngei han Pathien chong an misîr sûngin chu ruo juong lolina rangin invân khâr theina rachamneina an dôna. Anni ngei han tuinârnegei thisen minchang theina rachamneina khom an dôn sa, mapên han anni ngei hah rammuol hih an nuom dôr ripui murdi le dũkmintong theina rachamneina khom an dôn sa ani.

---

**11:1** 11:1: Ezek 40:3; Zak 2:1-2    **11:2** 11:2: Luk 21:24    **11:4** 11:4: Zak 4:3,11-14    **11:6** 11:6: 1 Rêng 17:1; Jôk 7:17-19; 1 Sam 4:8

<sup>7</sup> Min rietna chong an misîr suole chu, khur-mongboi renga sarâng hong jôk han anni ngei hah doi a ta. Ama han mene ngei a ta, male that ngei atih, <sup>8</sup> male an ruokngei hah an Pumapa an jêmdelna khopuilien roiinpui lamlien han inzamin om atih. Mintêkna rimingin chu ha khopuilien hah Sodom, aninônchu Egypt ani. <sup>9</sup> Namtina mingei, jâttina mingei, chongtina mingei le chitina mingei han an ruokngei hah sînthum chomân en an ta, male thâna phûm rangin phal ngei noni ngei. <sup>10</sup> Ha dêipungei inik ngei han pilchunga dûktongna tamtak an hong mintung sikin, hingei inik thi sikin pilchunga mingei an râisân a ta, râisânnân mang an ta male inkhat le inkhat neinunpêk inmuthuon inlôm an tih. <sup>11</sup> Sînthum chomân suole chu Pathien renga ringna phûk an sûnga ajuong lûta, male an indinga; male amu ngei murdi han an chi sabak zoi. <sup>12</sup> Hanchu dêipungei inik kôm han invân renga rôl inringtakin, “Hin hong roi!” ti chong an rieta. An râlngei an enchungchakin sûm lâia invân tieng an kal zoi. <sup>13</sup> Ma lâitak han ningnupui ahôn nîkka; khopuilien mun sôma semin munkhat chu achima, male mi isâng sari thatin an oma. Aringa la omngei han an chi sabaka, male invâna Pathien roiinpuina hah an manpâk zoi.

<sup>14</sup> Intakna inikna chu avun zoia, aniatachu intakna inthumna hah hong tung lai atih.

---

**11:7** 11:7: Dan 7:7; Chph 13:5-7; 17:8Dan 7:21    **11:8** 11:8: Isa 1:9-10    **11:11** 11:11: Ezek 37:10    **11:12** 11:12: 2 Rêng 2:11  
**11:13** 11:13: Chph 6:12; 16:18

*Bekul sarina*

<sup>15</sup> Hanchu vânfırton sarina han a bekul a hong tuma, “Atûn rammuol roijêkna chu ei Pumapa le Messiah ta ahongni zoi, male ama han tuonsôt tuonsôtin roijêk atih,” tiin invâna rôl inringtakngei ahong oma. <sup>16</sup> Hanchu upangei sômnikminli Pathien motona an rêngsukmunngeia ânsung ngei han inbokin Pathien chubai an mûka, <sup>17</sup> an ti chu:

“Pumapa Pathien Râtinchung, a om tit le a om saipu!

Ni sinthotheina roiinpui hah lâkin roijêk nu phut zoi sikin

no kôm râisânchong kin misır!

<sup>18</sup> Sonongngei hah ningthiknân an sip zoia, na taksi zora khom ahong tung zoi sikin, athi ngei roijêk pe ngei rang zora ha.

Ni fırlâmngei, dêipungei râisânman pêk rang zora ahong tunga,

male ni mi inthieng ngei murdi, nangma ranga mân thona dônpu ngei murdi, alien le achîn ân-angсарin.

Pilchung sietpu ngei sietminmang rang zora ahong tung zoi!” tiin Pathien chubai an mûka.

<sup>19</sup> Hanchu invâna Pathien biekin hah ân-onga, mahan Chonginkhitna Kok hah mu theiin aoma. Hanchu kôlinlek dadaptungei, khuon-ringei mechêk puokngei, ningnungei le iriel inriktak ngei ahong om zoi.

# 12

## *Nupangnu le Dragon*

<sup>1</sup> Hanchu misîrtheiloi neinun le roiinpuítak invâna ânlanga. Mahan nupangnu aoma, ân vônâ hah nisa ania, male a ke nuoia thâ aoma male a lua han rênglukhum ârsi sômleinik kop aoma. <sup>2</sup> Amanu han nâinei lai a ta, male nâihana tuongin chapin ân ieka.

<sup>3</sup> Misîrtheiloi neinun dang invâna ânlang nôka. Mahan Dragon sen lienpa lungei sari dôn le rikingei sôm dôn, a lu zeta rênglukhum inkhumín an oma. <sup>4</sup> A remei leh invâna ârsingei munthuma semín munkhat a jêma, pilchunga ajuong mathâk zoi. Nupangnu nâineisuo a sâk kelen theina rangin a moton tieng han ândinga. <sup>5</sup> Hanchu amanu han nâipasal a neia, namtina mingei chungâ thîr tôkmol leh roijêk rangpu ha. Aniatachu Pathien le a rêngsukmun tiengâ rangin nâipang hah sutpaiin le lâkpaiin aoma. <sup>6</sup> Nupangnu hah chu ramchâra, Pathien'n mun a minsûk pena, sùn isângkhat razannik sômruk sûnga donsûia a omna rang tieng han a rot zoi.

<sup>7</sup> Hanchu invâna râl aom zoia. Michael le a vântîrtonngeiín dragon hah doiin an inbuonpui, ama le a vântîrtonngei khom an inbuonpui dâna;

<sup>8</sup> aniatachu, dragon hah motorin aom zoi, ama le a vântîrtonngei hah chu invâna om rangin phal khâi mak ngei. <sup>9</sup> Hanchu dragon lienpa, tienlâia murûl, Diabol aninônchu Soitan an ti

ngâi, rammuol pumpui huongpu hah an mathâk pai zoi. Ama le a vântîrtonngei murdi khom pilchunga an juong mathâk pai ngei zoi.

<sup>10</sup> Hanchu invâna rôl inringtakin, “Atûn chu ei Pathien sanminringna le Rêngpa anghan a sinthotheina le a Messiah rachamneina ngei hah ajuong minlang zoi! Ei Pathien motona indinga sîn jâna ei lâibungngei le ei sarnungei nônnngâipu hah invân renga an mathâk pai zoi.

<sup>11</sup> Belrite thisen le chongtak an phuong sika han ei lâibungngei le ei sarnungei menena an changa, an ringna khom thi ngam rakin an phal sa zoi.

<sup>12</sup> Masikin nangni invânngai le asûnga omngei, nin râiminsân ta roi! Aniatachu pilchung le tuikhanglien rangin idôra ântak mo ani zoi! Asikchu Diabol hah nin kôm ajuong chum zoia, male ama hah taksinân a sipa, zora bongte vai ke a dôn zoi ti a riet sikin,” a ti ki rieta.

<sup>13</sup> Dragon han pilchunga juong mathâk paiin aom zoi tih ânriet lehan nâipasal nei nupangnu hah anûk a rujûl phut zoi.

<sup>14</sup> Amanu hah dragon'n a tôn phâk lolina rang kum thum in-ang donsûia a omna rang mun ramchâr tieng a vuong theina rangin minmupui mantha inik ngei hah pêkin aom zoi.

<sup>15</sup> Nupangnu hah tuiin achôipai theina rangin a nûka dragon'n a bâi renga tuilien angin aphîta. <sup>16</sup> Aniatachu pilchungin nupangnu hah asana; a bâi a-ânga dragon'n tui aphît hah amelem zoi. <sup>17</sup> Dragon hah nupangnu chung a ningthik sabaka, male a

---

**12:9** 12:9: Aph 3:1; Luk 10:18      **12:10** 12:10: Job 1:9-11; Zak 3:1  
**12:14** 12:14: Dan 7:25; 12:7

richisuonpârngei a la omngei Pathien chongpêk jômpu ngei le Jisua chongtak phuonga taksônôm ngei murdi hah doia inbuonpui rangin a se zoi. <sup>18</sup> Male dragon hah tuikhanglien panga han ânding\* zoi.

## 13

### *Sarângngei inik*

<sup>1</sup> Hanchu sarâng tuikhanglien renga hong jôk ku mua. Rikingei sôm dôn le lungei sari dôn ania; a riki zeta han rênglukhum aom leta, male a lu zeta han Pathien êrona riming aom sa. <sup>2</sup> Sarâng ku mu hah ikeiarsi aphuo, a kengei hah ivom kengei aphuo male a bâi hah ikeibaknei bâi aphuo. Dragon han sarâng kôm a sinthotheina, a rêngsukmun le a rachamneina lientak ngei hah a pêka. <sup>3</sup> Sarâng lungei kêra inkhat hah thi theina dôra popin ku mua, ani-atachu a sâbê hah ahong dam zoi. Pilchung pumpuia mingei han an kamâma, sarâng nûk an jûi zoia. <sup>4</sup> Sarâng kôm han a rachamneina a pêk sikin dragon hah mi murdi'n chubai an mùk zoi. Anni ngei han sarâng khom chubai an mùk sa, "Sarâng anga hi tumo aom? Tumo a doi thei rang?" tiin.

<sup>5</sup> Sarâng hah inpâk thei rang le Pathien êro thei rangin phal ania, male tha sômminlileinik

---

\* **12:18** 12:18: Male dragon ha ândinga; miziek senkhat ngei an dôn chuMale kên dinga, hi rachang hih imini anûkjûi lehin ânzomin aom. **13:1** 13:1: Dan 7:3; Chph 17:3,7-12 **13:2** 13:2: Dan 7:4-6

sûnga rachamnei rangin phal ani sa. <sup>6</sup> Pathien le a riming, aomna ngâi mun le invâna omngei murdi khomâksâm a phut zoi ani. <sup>7</sup> Pathien mingei doia mene rangin phal ani zoia, chitin, namtin, chongtin, le jâtin chung a rachamneina a kôm pêkin aom zoi. <sup>8</sup> Rammuol insieng mâna Belrite that sai ta ngei ringna lekhabua an riming chuongsai ngei tiloiin pilchung a omngei murdi'n ama chubaimûk an tih.

<sup>9</sup> "Hanchu, kuorngai nin dônin chu rangâi roi!  
<sup>10</sup> Tukhom suoka om rang anînchu suoka om tatak a ta, tukhom khandaia that rang anînchu khandai leh thatin om tatak a tih. Pathien mingei chu an tuongdier rang le taksônoma an om ranga koi an ni."

<sup>11</sup> Hanchu sarâng adang pilchung renga ahong jôk ku mua. Belrite angin rikingei inik a dôna, male dragon angin a chonga. <sup>12</sup> Sarâng inkhatna rachamneina lientak hah sarâng masa makunga a manga. Pilchung le a chung a miriem omngei hah sarâng masa thi theina dôra popsai, a dam nôk hah chubaimûk rangin a dânderîta. <sup>13</sup> Ma sarâng inikna han sininkhêlنگei roiinpui a thoa; invân renga pilchung a mi murdi mitmua mei a juong musuma. <sup>14</sup> Male sarâng inkhatna mitmua sininkhêlنگei tho ranga phalna a man sika han pilchung a mingei murdi a huonga; an kôm, sarâng khandaia pop sai la dam nôk miritna rangin ama rimil sin rangin chong a ril ngeia. <sup>15</sup> Sarâng inkhatna rimil hah a chong theina rang

---

**13:5** 13:5-6: Dan 7:8,25; 11:36    **13:7** 13:7: Dan 7:21    **13:8**  
 13:8: Lap 69:28    **13:10** 13:10: Jer 15:2; 43:11



le chubaimûk loi ngei murdi a that theina rangin sarâng inikna kôm han ringna phûk pêk theina rangin phalna pêk ani. <sup>16</sup> Mingei murdi, achîn alien, anei ânrieng, suok le zalen mi khom an kut changtiengngeia aninônchu an machalngeia sînthona dôn pak rangin a dânderîta. <sup>17</sup> Sarâng riming aninônchu a riming number sînthona dônloi ngeiin chu tutên ite rochôk theiloi le zuor theiloi rangin.

<sup>18</sup> Mahin vârna anâng. Tukhom riettheina dônin chu sarâng number hah aomtie ha sût rese, munisi riming number ani sikin 666 ani.

## 14

### *Belrite le a mingei*

<sup>1</sup> Hanchu ko hong ena, male Belrite ha Zion Tâng chung; mingei 144,000 an machalngei han ama riming le a Pa riming ânziek leh an inding ku mua. <sup>2</sup> Male invân renga rôl, tuitâk rahang angati le mechêk puok rahang inringtak angin ki rieta. Serânda âtpungeiin an serândangei an ât miringhoi angin ânringa. <sup>3</sup> Rêngsukmun motona han mingei 144,000 iring parân minli ngei le upangei an indinga; anni ngei han lâ thar an thoa, anni ngei vai an inchu thei hah. Rammuola mi murdi lâia anni ngei vai hah ratan an ni. <sup>4</sup> Anni ngei hah pasal an thethena ânthienga om, nupang leh inmannangei dônloi; ânthienghie an ni. Belrite sênana an jûi ngâi. Anni ngei hah Pathien le Belrite kôma pêk masatak ni ranga

munisi chitin lâi renga ratan an ni. <sup>5</sup> Anni ngei hah milakngei ril tet ngâi mak ngeia; dikloina reng dôn mak ngei.

*Vântîrton inthum ngei*

<sup>6</sup> Hanchu pilchunga mi murdi, namtina mingei, jâtina mingei, chongtina mingei, chitina mingei kôm tânghâi rang Kumtuong Thurchi Sa dôn vântîrton dang invânlâia insângtaka vuong ku mua. <sup>7</sup> Ama han rôl inringtakin, “Pathien mirit unglâ male ânlalna minpâk roi! Mingei murdi chungâ roijêk rangin a zora ahongtung zoi sikin. Invân, pilchung, tuikhanglien le tuinârngei sinpu hah chubaimûk roi!” a tia.

<sup>8</sup> Vântîrton inikna han vântîrton inkhatna a hong jûia, “Amanu hah ânlet zoi! Babylon roiinpui ânlet zoi! Amanu han a hurna uain rất mingei murdi min nêk ngâi hah ânlet zoi!” a tia.

<sup>9</sup> Vântîrton inthumna han vântîrton inkhatna le inikna a jûia, rôl inringtakin, “Tukhom sarâng le arimil chubaimûk ngâipu ngei le sînthona an machala aninônchu an kuta dôn ngei chu <sup>10</sup> anninâkin Pathien uain, a ningthikna uain, a taksina kilâta a sung minsip hah nêk an tih! Ma angâ thopu ngei murdi chu vântîrton inthieng ngei le Belrite makunga meia le kâta dûkphenêngin om an tih. <sup>11</sup> Anni ngei dûkphenêngna meikhu hah tuonsôt tuonsôtin chungtieng kal tit atih. Sarâng le arimil chubaimûkpû ngei le ariming sînthona dôn ngei

---

**14:5** 14:5: Zep 3:13    **14:8** 14:8: Isa 21:9; Jer 51:8; Chph 18:2

**14:10** 14:10: Isa 51:17; Aph 19:24; Ezek 38:22

ta rangin chu sôn le jân ahoina reng om pe ngei khâi no nih.”

<sup>12</sup> Mahin Pathien mingei, a chongpêkngai jôma Jisua ta ranga taksônôm ngei chu tuongdierna an dôn rang ani.

<sup>13</sup> Hanchu invân renga rôl ki rieta, “Mahi miziek roh: atûn renga chu Pumapa sinthona taka thi ngei chu satvur an ni!” a tia.

“Ani tatak!” tiin Ratha han a thuona. “An sinsôlna renga inngam an tih, an sinthona marangei han a jûi ngei sikin.”

### *Pilchung bu-ât zora*

<sup>14</sup> Hanchu ko hong ena, male sôm ngoi aoma, male sôm chung a ânsungpu hah munisi aphua, a lua rângkachak rênglukhum a khuma, a kuta kôite ngaidak choiin ânsunga. <sup>15</sup> Hanchu vântîrton dang Pathien biekin renga ahong jôka, sôm chung a ânsungpu kôm han rôl inringtakin, “No kôite mang inla bu hah ât roh, a ât zora ani zoi; pilchunga bungei hah an min zoi sikin,” a tia.

<sup>16</sup> Hanchu sôm chung a ânsungpu han pilchunga a kôite a vaia, male pilchung bungei hah âtin an om zoi.

<sup>17</sup> Hanchu vântîrton dang invâna Pathien biekin renga a hong jôk ku mua, male ama khom kôite ngaidak a dôn sa.

<sup>18</sup> Hanchu vântîrton dang, mei enkolpu hah mâichâm renga a hong a. Ama han kôite ngaidak dônpu kôm han rôl inringtakin, “No kôite mang inla, male pilchunga grapebil renga grapengei

khu juong ât roh, grapengei khu amin zoi sikin!" tiin ân ieka. <sup>19</sup> Masikin vântîrton han a kôite pilchunga a vaia, grapengei hah a âta, male Pathien ningthikna grape sômna khurpuia han a thun zoi. <sup>20</sup> Grapengei hah khopuilien pântienga grape sômna khura han a sôma, male ma khur renga han thisen tuilien ahong suoka, aseï kilometer razan thum, ânthûk meter inik dôr ani.

## 15

### *Vântîrtongei leh anûktak ripuingei*

<sup>1</sup> Hanchu invâna misîrtheïloi neinun dang, roiipuitak le kamâmom ku mua. Mahan vântîrtongei sari leh ripuingei sari an oma, maha anûktakna ania, Pathien taksina misîrna mongnatak ngei an ni zoi sikin.

<sup>2</sup> Hanchu mei leh ânpol lîm-en tuikhanglien phuozeke ku mua. Sarâng menepu ngei rimil le riming number dônpu ngei khom ku mu ngei sa. Anni ngei hah Pathien'n a pêk ngei serândangei chôiin lîm-en tuikhanglien kôla an indinga <sup>3</sup> male Pathien tîrlâm, Moses lâ, le Belrite lâ hah an thoa:

"Pumapa Pathien Râtinchung,  
ni sinthongei chu idôra roiinpui le  
kamâmom mo ani zoi!  
Namtinngêi Rêngpa,\*  
na lampuingei chu adikin asa tatak!

---

**14:20** 14:20: Isa 63:3; Chap 1:15; Chph 19:15    **15:3** 15:3: Jôk 15:1    \* **15:3** 15:3: namtinngêi; miziek senkhat ngei an dôn chu kumngêi.

<sup>4</sup> Pumapa tumo nang rin loa ânding loi rang?  
 Tumo no roiinpuina phuông nuomloi rang?  
 Nangma vai ke ânthieng ni ni.

Namtinngai hong an ta  
 male chubai nang mûk an tih,  
 ni sintho adik ngei hah mi murdi'n an mu  
 sikin.”

<sup>5</sup> Masuole han invâna biekin ân-ong ku  
 mua, asûnga han Puon In Inthieng aoma.

<sup>6</sup> Vântûrtonngai sari ripuingei sari chôî ngei hah  
 biekin renga an hong jôka, puoninnêm ânthieng  
 ântêrdap leh invôn an rôpngai han rângkachak  
 kongrûingei an khita. <sup>7</sup> Hanchu iring parân

minli ngei lâia inkhat han vântûrton sari ngei  
 kôm han Pathien tuonsôt tuonsôta ring titpu  
 taksina sip, rângkachak khuriâingei sari a pêka.

<sup>8</sup> Biekin hah Pathien roiinpuina leh sinthotheina  
 meikhûn asip zoia, male vântûrton sari ngeiin  
 ripuingei sari an hongchôî hah ahek mâka chu  
 Pathien biekinna han tute lût thei mak ngei.

## 16

### *Pathien taksina khuriâingei*

<sup>1</sup> Hanchu Pathien biekin renga han rôl inring-  
 takin vântûrton sari ngei kôm han: “Se unglâ,  
 Pathien taksina khuriâi sari ngei hah pilchunga  
 juong bunpai roi!” tiin chongin ki rieta.

<sup>2</sup> Vântûrton inkhatna hah a sea, a khuriâi hah  
 pilchunga ajuong bunpai zoi. Sarâng sînthona

dônpu ngei le a rimil chubaimûkpu ngei chung a han pânse natak asuok zoia.

<sup>3</sup> Hanchu vântîrton inikna han a khuriâi hah tuikhanglien sûnga a bunpaia; tui pumpui hah mithi thisen angin ahong om zit zoi, male tuikhangliena iring parângei murdi an thi let zoi.

<sup>4</sup> Hanchu vântîrton inthumna han a khuriâi hah tuidungngei le tuinârgei han a bunpaia, thisen ahong chang zit zoi. <sup>5</sup> Vântîrton tuingei enkolpu han, “O Mi Inthieng, A om tit le A om sai piel! No roijêkna chu adik ani. <sup>6</sup> Anni ngei han Pathien mingei le dêipungei thisen an mu suok sika thisen nêk rang ne pêk ngeia. An man rang rohoi piel an man ani!” a ti ki rieta. <sup>7</sup> Hanchu mâichâm renga han rôl ki rieta, “Pumapa Pathien Râtinchung! No roijêknangei chu adikin asa tatak ani!” a tia.

<sup>8</sup> Hanchu vântîrton minlina han a khuriâi hah nisa chung a bunpaia, male nisa hah miriemngei kâng minlôngzit rangin phal ani zoi. <sup>9</sup> Anni ngei hah nisa lum taka kâng minlôngin an om zoia, ha dûktongna ripuingei chung a rachamneipu Pathien riming hah khomâk an sâma. Aniatachu an sietnangei renga inheiin ânalna minpâk uol mak ngei.

<sup>10</sup> Hanchu vântîrton rangngana han a khuriâi hah sarâng rêngsukmuna han a bunpaia. A rênggram hah ijingin abômkhap zoia, miriemngei hah ana an riet rai sikin an meleingei an peta, <sup>11</sup> male an nangei sik le an pângei sikin invâna

Pathien khomâk an sâma. Hannirese an sintho saloi lampuingei renga hah inhei uol mak ngei.

<sup>12</sup> Hanchu vântîrton urukna han a khuriâi hah Euphrates tuidung lien han a bunpaia. Nisuo tienga rêngngei a hong rang ngei ta rangin lampui sinsai ani theina rangin tuidung hah akangphar zoi. <sup>13</sup> Hanchu dragon bâi, sarâng bâi le dêipu dikloi ngei bâi renga ratha inthiengloi ngei inthum uichokngei angati ku mua. <sup>14</sup> Anni ngei hah ramkhoringei rathangei sininkhêl ngei sin ngâi an ni. Pathien Râtinchung Nikhuo roiinpuia indoina taka hong koi mintûp rangin ma ratha inthum ngei ha rammuol pumpuia rêngngei murdi kôm an se zoi.

<sup>15</sup> “Rangâi roh! Inru angin kêng ku juong rang! Masikin mipui kêra dierkaiboia lônin mâimôk an shak loina rangin, tukhom inningchiena om ngâipu le a puonngei insil chienna om ngâipu chu satvur ani!”

<sup>16</sup> Hanchu rathangei han rêngngei hah munkhata Hebrew chongin Armageddon an ti muna han an koibûm ngei zoi.

<sup>17</sup> Hanchu vântîrton sarina han a khuriâi hah phâivuo kêra a bunpaia. Biekina rêngsukmun renga rôl inringtak ahong oma, “Anthot zoi! a tia. <sup>18</sup> Mahan kôlinleka dadaptingei, mechêk puokngei, le ningnupuingei ahong oma. Pilchunga munisingei sinphut renga ma angdôra ningnupui hah chu la om ngâi maka; maha ningnupuingei lâia a siettak ala

---

**16:12** 16:12: Isa 11:15      **16:15** 16:15: Mat 24:43-44; Luk 12:39-40; Chph 3:3      **16:16** 16:16: 2 Rêng 23:29; Zak 12:11

ni!” <sup>19</sup> Khopuilien roiinpui hah munthumin ânphala, male ram pumpuingeia khopuilienggei sietin an om zoi. Pathien'n Babylon roiinpui hah a rieltita, male a khuri le uain a min nêka— a ningthik sabakna uain hah. <sup>20</sup> Tuihuolngei murdi ân mang rieia, muolngei murdi khom ân mangrip zoi. <sup>21</sup> Iriel lientatak ngei her sôm ranga dôra rik, invân renga miriemngei chung ajuong tâka, ha iriela dûktongna ripui an tong hah ana rai sikin Pathien khomâk an sâm zoi.

## 17

### *Notizuor inthang*

<sup>1</sup> Hanchu vântûrton sari ngei khuriâi sari chôl ngei lâia inkhat a hong a, ko kôm, “Hong roh, tuidung tamtak kôla sin khopuilien roiinpua notizuor inthang dûkmintonga om rang tie hah nang min mûng ki tih, a tia. <sup>2</sup> Pilchunga rêngngeiin amanu leh an inrêpui ngâia, pilchunga mingei murdi khom an inrêpuina uain nêkin an inrûi ngâi.”

<sup>3</sup> Ratha'n ni manga, male vântûrtonin ram-châra ni tuonga. Mahan Pathien êrona riming mizieka sip, lungei sari le rikingei sôm dôl, sarâng seninlâr chung ajuong nupang ku mua.

<sup>4</sup> Nupangnu hah puon senduk le seninlârin ân voa, rângkachak retheingei, lungmantamngei le

---

**16:18** 16:18: Chph 8:5; 11:13,19      **16:19** 16:19: Isa 51:17

**16:20** 16:20: Chph 6:14      **16:21** 16:21: Jôk 9:23; Chph 11:19

**17:1** 17:1: Jer 51:13      **17:2** 17:2: Isa 23:17; Jer 51:7      **17:3**

17:3: Chph 13:1



lungintêrnegei leh ân voa. A kuta mitir om le a hurna porinchena neinunngeia sip rângkachak khuri a chôia. <sup>5</sup> Amanu machala han riming, aomtie inthup, “Babylon roiinpui, rammuola notizuornegei murdi le pinkuohurngei nû,” tiin miziekin aoma. <sup>6</sup> Male ha nupangnu hah Pathien mingei thisen le Jisua ranga iemom sika thata omngei thisen inrûiin ku mua.

Amanu hah ku mu lehan, ka kamâm sabaka. <sup>7</sup> “Itho mo na kamâm baka?” tiin vântûrton han mi rekela. Nupangnu le a chuongna sarâng lungei sari le rikingei sôm dôn omtie inthup nang ril ki tih. <sup>8</sup> Sarâng hah voikhat chu a lei ringa, aniatachu ring khâi maka; khurmongboi renga hong jôk a ta, inmangna han sêng atih. Pilchunga miriem omngei, rammuol insieng mâna ringna lekhabua an rimingnegei mizieka omloi ngei han sarâng hah an mu tena chu anrêngin kamâm an tih. Voikhat chu a ringa; atûn chu ring khâi maka, hannirese la hôn lang nôk atih.

<sup>9</sup> Mahin vârna le rietheina anâng. Lu sari ngei hah nupangnu insungna muol sari ngei hah an ni. Anni ngei hah rêngngei sari ngei khom an ni sa: <sup>10</sup> rangnga ngei chu an inleta, inkhat chu alân lala, inkhat chu la hong inlal maka, hong inlal khomrese chomolte vai roijêk atih. <sup>11</sup> Male sarâng voikhat alei ringa, aniatachu aring khâi loi khom hah sari ngei kêra inkhat rêngpa irietna ania, inmangna tieng a se tir zoi ani.

<sup>12</sup> “Riki sôm nu mu ngei hah rêngngei sôm

ala hônlal loi ngei hah an ni, aniatachu sarâng le rêngngei anghan konta khat chu inlal rangin rachamneina pêk la nîng an tih. <sup>13</sup> Ma sôm ngei hah anrêngin an neinunkhîn dôn munkhat ania, male an sinthotheina le rachamneina hah sarâng kôm pêk an tih. <sup>14</sup> Belrite hah doiin inbuonpui an ta; aniatachu Belrite hah pumangei Pumapa le rêngngei Rêngpa ani sikin anni ngei hah mene ngei a ta, a menena hah a koi ngei, a thangsai ngei, le taksônoma ama nûkjûipungei khomin changsa an tih.”

<sup>15</sup> Ma vântîrton nanâk han ko kôm, “Notizuornu insungna ngâi tuingei nu mu hah, namtingei, mingei, jâtngai le chongngai an ni, a tia. <sup>16</sup> Rikingei sôm le sarâng nu mu ngei han notizuornu hah dem an ta; a neinun dôn ngei murdi lâk pe let an ta, akorongin mâkrak an tih; a meh khom sâk an ta, mei leh hâlminmang an tih. <sup>17</sup> Pathien chongngai le a neinunkhînngai ahongtung adik theina rangin sarângin roiajêkna rangin an sinthotheina hah a kôma pêk rangin Pathien'n an mulungngai sûnga inruolna a dar pe ngeia.

<sup>18</sup> “Nupangnu nu mu hah khopuilien roiinpui pilchunga rêngngei chungga roijêk ngâipu hah ani.”

## 18

### *Babylon ânletna*

<sup>1</sup> Masuole chu vântîrton dang invân renga juong chum ku mua. Ama han rachamneina

lientak a dôna, male a roiinpuiân pilchung  
 pumpui a êlminvâra. <sup>2</sup> Ama han rôl inringtakin  
 ân ieka: “Amanu hah ânlet zoi! Babylon  
 Roiinpui hah ânlet zoi! Amanu hah atûn chu  
 ramkhoringei le ratha innim ngei omna mun;  
 mitir om jâtngai murdi le vâ innim ngei le ram  
 sâ innim ngei chekinbuolna mun ahongni zoi.  
<sup>3</sup> Namngai murdi'n amanu uain hah an nêka  
 a hurna uain rât hah. Pilchunga rêngngeiin  
 amanu hah an inrêpui ngâia, male a hurna  
 zotorboi renga rammuola sadâi mingei an neipui  
 ngâi,” tiin.

<sup>4</sup> Hanchu invân renga rôl dangin:

“Hong jôk roi, ki mingei! Amanu renga hah hong  
 jôk roi!

Amanu sietnangei han nin inchel tet rang  
 nimak;

Amanu dûktongna han khom nin tong rang  
 ni tet mak!

<sup>5</sup> Amanu sietnangei hah invân insângtak ahong  
 sunrak zoia,  
 male Pathien'n a dikloina lampuingei khom  
 a riittit ngâi.

<sup>6</sup> Nin chung a tholam anghan a chung a khom  
 tho unglâ;  
 a tho ngei murdi hah bâknikin thuo nôk roi.  
 Ju nêk ranga nangni a mintuo pe anghan bâknika  
 râtin a kilât minsip pe roi.

---

**18:2** 18:2: Isa 13:21; 21:9; Jer 50:39; 51:8; Chph 14:8      **18:3**  
 18:3: Isa 23:17; Jer 51:7      **18:4** 18:4: Isa 48:20; Jer 50:8; 51:6,45  
**18:5** 18:5: Aph 18:20,21; Jer 51:9      **18:6** 18:6: Lap 137:8; Jer  
 50:29

7 Amanu hah dûktongna tamtak le ngâsietshak  
roi  
roiinpui an ti le hoiinhâia amanunanâk  
ânpêk anghan.

Amanunanâk mulungrîlin ân tia:

‘Mahin, rêngnûn kên sunga!

Meithâi reng ni mu-ung,

Ngâsietna reng tong tet no ning!’

8 Hima sikin, sûnkhat sûngin amanu hah  
dûktongna leh ripuingei,  
natna, ngâsietna, le mâitâm hong tung pe  
atih.

Male amanu hah mei leh hâlin om atih,  
asikchu amanu, a roijêkpu hah, Pumapa  
Pathien râtak ani,” tiin ki rieta.

9 Pilchunga rêngngei amanu ân-rêpui ngâi ngei  
le hoiinhâipui ngâi ngei han ma khopuilien  
kângna khu hah an mu tika chu chapin la châ  
an tih. 10 Amanu dûktongna hah tong sa ni-ung  
ti an chi sikin alazanna an indinga. Anni ngei  
han, “Babylon khopuilien roiinpui le det! Nu  
chungroi ântak! Nu chungroi ana! Konta khat  
sûngin te dûkmintongin no om zoia!” an tia.

11 Pilchunga sadâi mingei khom han amanu  
hah beidongin an châ zoia, tutên an neinunngiei  
an rochôk khâi loi sikin; 12 tutên an rângkachak,  
sumdâr, lungmantamngiei, le lungintêrngiei;  
an rosompun neinunngiei, puonsendukngiei,  
puoninnâlngiei, le puonseninlârngiei; thing  
mirimhoi jât dadangngiei le sâiha leh an

sin ngei murdi le thing manluttak, sumdâr le thîr le sâilungvâra an sin ngei; <sup>13</sup> male thingruzunghumngei, sâkjât mirimhoi ngei, mirimhoi hâljâtngai, murra le bero, uain le olive sariék, vâipôldi le bu, serâtte le belri, sakor le sakorkaringei, suokngei le munisi ringnangei an ni. <sup>14</sup> Sadâi mingeiin amanu kôm han, “Neinun asa ngei dôn ranga nu nuom murdi hah ân mang suo zoi, male ne neina le ne enhoina murdi ahek zoi, man nôk tet khâi no ti nih!” an tipea. <sup>15</sup> Sadâi mingei ma khopuiliena sadâi an thona sika hong nei ngei han, a dûktongna han tong sa ni-ung tih chí sikin alazanna inding an tih. Beidongin châ an ta, <sup>16</sup> male, “Khopuilien roiinpui rangin idôrmo ântak! Idôrmo ana! Amanu han rosompuon, puonsenduk le seninlâr, male rângkachak retheingei, lungmantakngai le lungintêrngai leh ânvo ngâia! <sup>17</sup> Male konta khat sângin te a neinunsampâr murdi ân mang let zoi hi,” tîng an tih.

Rukuonga ulienngai le a chuongngai, le rukuong chôipungei le adadangngai tuikhangliena ânloa ânvai ngei murdi khom alazanna indingin, <sup>18</sup> male amanu kângna meikhu hah an mûn chu: “Hi khopuilien roiinpui anga khopuilien hi chu la om reng ngâi mak!” tiin an inieka. <sup>19</sup> An lua phildi an phula, beidongin an chapa, “Khopuilien roiinpui rangin, idôra ântak! Idôra ana mo

---

**18:12** 18:12-13: Ezek 27:12,13,22    **18:15** 18:15: Ezek 27:31,36

**18:17** 18:17: Isa 23:14; Ezek 27:26-30    **18:18** 18:18: Ezek 27:32

ani zoi! Amanu hah khopuilien a neina sika tuikhangliena rukuong dôn ngei khom lei nei sa thei! Konta khat sùngin le neinunngai murdi ân mang let zoia!” an tia.

<sup>20</sup> Invân le Pathien mingei nan râmînsân roi! tîrtonngai le dêipungei nin râmînsân roi! Nin chung a tholam angtaken Pathien'n a dem zoi sikin!

<sup>21</sup> Hanchu vântîrton râttak hin bunôinalung lienpa dôra angha a lâka male tuikhangliena a vôrra, “Babylon khopui roiinpui tak chu hima dôra nân vôr nîng a ta, tutên mu nôk tet khâi noni ngei, a tia. <sup>22</sup> Serânda miringngai, munisi rôlنگai, theili miringngai le bekul miringngai nu sũa riet nôk ni tet khâi no nih! Sin zongna lama a sin thei mi reng nu sũa om tet khâi noni ngeia; male nu sũa han sângsuk rahang khom riet nôk ni tet khâi no nih! <sup>23</sup> Nu sũa han châti vâr khom mu nôk tet ni khâi no nia; mâk le moi rahang reng nu sũa han riet ni tet khâi no nih. Na sadâi mingei hah rammuol pumpuia mi liengngai an nia, male no dôi dikloiin rammuol pumpuia mingei nu huong ani!”

<sup>24</sup> Babylon hah dêipungei le Pathien mingei thisen suokna khopuilien ani sikin dũkmintongin aoma; ani, pilchunga thata omngai murdi thisen suokna ani.

---

**18:19** 18:19: Ezek 27:30-34    **18:20** 18:20: Bal 32:43; Jer 51:48  
**18:21** 18:21: Jer 51:63-64; Ezek 26:21    **18:22** 18:22: Ezek 26:13; Isa 24:8    **18:22** 18:22-23: Jer 7:34; 25:10    **18:24** 18:24: Jer 51:49

## 19

<sup>1</sup> Masuole han invâna loko mipui tamtak ngei he rahang inringtak angati, “Pathien minpâk roi! Sanminringna, roiinpuina, le sinthotheina ngei chu ei Pathien ta ani! ti ki rieta. <sup>2</sup> A roijêknangei chu adikin asa ani! Ama han notizuor inthang, ânreña sika pilchung siet ngâi le a tîrlâmngêi that ngâinu theiloi minchangin dûk a mintong zoi.” <sup>3</sup> An iniek sira, “Pathien minpâk roi! Khopuilien roiinpui kâng minhekna meidonngêi renga meikhu chu tuonsôt tuonsôtin chungtieng kal tit atih!” <sup>4</sup> Upangei sômnikminli le iring parân minli ngei han inbokin, “Amen! Pathien minpâkin om rese!” tiin rêngsukmuna insungpu hah chubai an mûka.

### *Belrite inneina ruolhoitho*

<sup>5</sup> Hanchu rêngsukmun renga han rôl ahôn ringa, “Ei Pathien manpâk roi, a tîrlâmngêi murdi le mingêi murdi, achîn alien, ama mirit tho ngei murdi'n!” a tia. <sup>6</sup> Hanchu loko tamtak rahang, tuitâk rahang angati, mechêk puok rahang inringtak angati, “Pathien minpâk roi! Pumapa ei Pathien Râtinchung hih Rêngpa ani! an ti ki rieta. <sup>7</sup> Ei râiminsân ei ti u; a roiinpuina minpâk ei ti u! Belrite innei zora ahong tung zoi, male a moi khom amananâkin ânthok zoi. <sup>8</sup> Amanu hah puoninnêm ânthieng ântêrdap insil rang pêkin aom zoi.” (Puoninnêm hih Pathien mingêi sintho asa ngei hah ani).

<sup>9</sup> Hanchu vântîrton han ko kôm, “Mahi miziek roh: Belrite inneina ruolhoia siela omngei chu satvur an ni.” Male vântîrton han abôk sira, “Ma ngei hi Pathien chong dik ngei ani,” a tia.

<sup>10</sup> A ke bula chubaimûk rangin kên boka, aniatachu ama'n, “Ma anghan tho no roh! Keima khom ni tîrlâm champui le iempu champuingei, Jisua chongtak phuônga pompu ngei murdi na champui kêng ki ni. Pathien chubaimûk roh!” ni tia.

Jisua chongtak a phuông hih Pathien chon-grilna ratha ani.

### *Sakor ngoi chungu chuôngpu*

<sup>11</sup> Hanchu invân ân-ong ku mua, male ma-han sakor ngoi aoma. Achungu chuôngpu hah Taksônom le Adik ani; ama han adiktakin roi a jêka a râl ngei a doi ngâi. <sup>12</sup> A mitngei hah meidon aphuoá, male a lua rênglukhumngei tamtak ân khuma. A chungu riming ânziek amanânâk pêna chu tutên imo aomtie an riet theiloi a dôna. <sup>13</sup> Kâncholiin chuol thisen ân zozit ân haka. A riming chu, “Pathien Chong,” ani. <sup>14</sup> Invâna râlmingei han a nûk an jûia, puoninnêm ngoi ân thieng leh invôn sakor ngoi ngei chungu an chuônga. <sup>15</sup> A bâi renga khandai ngaidak ahong jôka, ma lehan namtingei doiin mene atih. Thîr tôk mol le an chungu roijêk a ta, male Râtinchung Pathien taksina natak uain sômna khur sũaga han sirdên atih. <sup>16</sup> A kâncholiin chuol le a keêla

---

**19:9** 19:9: Mat 22:2-3    **19:11** 19:11: Ezek 1:1; Lap 96:13; Isa 11:4    **19:12** 19:12: Dan 10:6    **19:15** 19:15: Lap 2:9; Isa 63:3; Joel 3:13; Chph 14:20



han, “Rêngngei Rêngpa le pumangei Pumapa,” ti riming miziekin aoma.

<sup>17</sup> Hanchu vântîrton nisa chungă ânding ku mua. Phâivuo kêra vângei avuong murdi kôm han rôl inringtakin ân ieka: “Hong unglă hântup roi Pathien ruolhoi roiinputitaka rangin! <sup>18</sup> Hong unglă, rêngngei meh, râlmi uliengei meh, le râlmingei meh, sakorngēi meh le a chungă chuongngēi meh, mingēi murdi meh, suokngēi meh le zalēngēi meh, alien le achîn ngei meh, hong sâk roi!” a tia.

<sup>19</sup> Hanchu sarâng le pilchungă rêngngei le an râlmingei hah sakor chungă chuongpu le a râlmingei doia inbuonpui rangin an hântup ku mua. <sup>20</sup> Sarâng hah an sūra, dêipu dikloi a mitmua sininkhêlŋgei sinpu hah khom an sūr sa. (Ma sininkhêlŋgei a sin sika han sarâng sînthona dôn ngei le arimil chubaimûk ngâipu ngei hah a huong ngei ngâi ani.) Sarâng le dêipu dikloi ngei anruonin an ringchungin kêta kêng, meidîla han an vôrpai ngei zoi. <sup>21</sup> An râlmingei hah chu sakor chungă chuongpu bâia hong jôk khandai lehan a that ngeia; male vângei murdi han an phari dodôrin an meh ngei hah an sâk zoi.

## 20

### *Kum isâng ngei*

<sup>1</sup> Hanchu invân renga vântîrton juong chum a kuta khurmongboi chabi le Zingjirûi lienpa chôi ku mua. <sup>2</sup> Dragon, tienlâia rûlpui, maha Diabol,

aninônchu Soitan hah a sũa, kum isâng khat rangin a khitbel zoi. <sup>3</sup> Vântîrton'n khurmongboia han a mathâk paia, a khâra, kum isâng ahek mâka chu namtinngai a huong khâi lolina rangin a kalrap zoi. Masuale chu ama hah chomolte rangin mojôk ngêt nîng atih.

<sup>4</sup> Hanchu rêngsukmunngai ku mua, a chung a ânsungpu ngai hah roijêk thei rangin rachamneina pêkin an oma. Jisua'n chongtak a phuong le Pathien chong an misîr sika an lutana omngai rathangei khom ku mu sa. Anni ngai han sarâng le arimil chubaimûk mak ngeia, sarâng sînthona khom an machalngeia mo, aninônchu an kutngeia mo khom dôn uol mak ngai. Anni ngai hah an hong ringa, male Khrista leh rêngngai anghan kum isâng roijêk rangin an om zoi. <sup>5</sup> (Mithi dangngai hah chu kum isâng ahek mâka chu la ring mak ngai.) Mahi thina renga inthoinôkna masatak ani. <sup>6</sup> Ma inthoinôkna masataka inchelpu ngai chu ânthieng le vânsa tatak an ni. Thi inikna han an chung a rachamnei khâi maka; anni ngai hah Pathien le Khrista ochaingai nîng an ta, male ama leh kum isâng khat roijêk an tih.

### *Soitan menena*

<sup>7</sup> Kum isâng ahek suole chu, Soitan hah ân tângna renga mojôk nîng a ta, <sup>8</sup> male ama han namtinngai rammuol pumpui chung a chekin-châingai huong rangin sêng a ta, Gog le Magog. Soitan'n râlbuola rangin anni ngai hah hong

mintûp ngei a ta, an tamtie chu tuikhanglien panga sietsai tamdôr nîng an tih. <sup>9</sup> Pilchung pumpuia an inzara male Pathien mingei rubuk le khopuilien a lungkham ngâi hah an huola. Ani-atachu invân renga mei ajuong chuma anni ngei hah akâng minmang ngei zoi. <sup>10</sup> Hanchu Diabol, anni ngei huongpu, hah sarâng le dêipu dikloi an lei vôrpaia mei le kât ðila han an vôrpai zoia; male anni ngei hah tuonsôt tuonsôtin sîn le jân dūkphenêng bitin om an tih.

### *Roijêkna azoina*

<sup>11</sup> Hanchu rêngsukmun ngoi lienpa inkhat le a chung a ânsung ngâipu hah ku mua. Amakung renga han pilchung le invân an rotpaivinga, male mu nôk nikhâi mak ngei. <sup>12</sup> Male mithi ngei, alien achîn ân-angarin, rêngsukmun motona an indingin ku mua. Lekhabungei ânphara, male lekhabu dang ringna lekhabu khom ânphar sa. Mithi ngei hah an sin lei tho dungjûiin, lekhabungeia achuong anghan an roijêkin an om zoi. <sup>13</sup> Hanchu tuikhanglien han asûnga mithi omngei hah ahong mojôk paia. Thina le mithi khuon an sûnga mithi omngei hah an hong mojôk ngei sa. Male anrêngin an sin lei tho dungjûiin an roijêkin an om zoi. <sup>14</sup> Hanchu thina le mithi khuo ngei hah meidila vôrpaia an om zoi. (Hi meidil hih thi inikna ani.) <sup>15</sup> Tukhom ringna lekhabua an rimingnei mizieka omloipu ngei kai chu meidila han an vôrpai ngei zoi.

# 21

## *Invân thar le pilchung thar*

<sup>1</sup> Hanchu invân thar le pilchung thar ku mua; invân masa le pilchung masa ngei ha ânmana, male tuikhanglien khom ânmanagripi zoi. <sup>2</sup> Male Khopuilien Inthieng, Jerusalem thar hah, moiin a pasal don ranga ânthoka ân zoisai anghan Pathien kôm invân renga juong chum ku mu sa. <sup>3</sup> Rêngsukmun renga rôl inringtakin ahong chongin ki rieta: “Atûn Pathien in chu munisingei lâia ajuong om zoi! Ama chu an kôm om a ta, male anni ngei hah a mingei nîng an tih. Pathien lelên an kôm om a ta, male ama hah an Pathien nîng atih. <sup>4</sup> Ama'n an mitta mitrithingei murdi hûiminsâi pe ngei atih. Thina om khâi no nia, beidongnangei, chapnangei aninônchu natnangei khom om khâi no ni. Neinun muruo ngei hah ânman suozoi.”

<sup>5</sup> Hanchu rêngsukmuna insung ngâipu han a tia, “Male atûn chu neinunngeni murdi ki sin minthar zoi!” Ama han ko kôm, “Ma hih miziek roh, asik chu hi chongngeni hih adik le taksônôm an ni, a ti sa.” <sup>6</sup> Male ko kôm, “Ân zoi suozoi! Keima hih amotontak le anûktak, aphutna le amongna ki nih. Tukhom an tuiinrâl ngei murdi chu ringna tuikuong renga han amanboiin min nêk ngei ki tih, a tia. <sup>7</sup> Amenepu ngei ngân chu hima ngei hih ko kôm renga man an tih: keima

---

**21:1** 21:1; Isa 65:17; 66:22; 2 Pet 3:13    **21:2** 21:2; Isa 52:1; 61:10; Chph 3:12    **21:3** 21:3; Ezek 37:27; Och 26:11,12    **21:4** 21:4; Isa 25:8; 35:10; 65:19    **21:6** 21:6; Isa 55:1

an Pathien nîng ka ta, male anni ngei hah ka nângei nîng an tih. <sup>8</sup> Aniatachu mithâidôpngei, iemomloingei, pinkuohurngei, mithatngei, inditnasaloi thongei, dôichôingei, mirmil biekngei, le milakngei murdi—omna rang mun chu mei le Kât kângna dîl hah ani, maha thi inikna ani.”

### *Jerusalem thar*

<sup>9</sup> Vântîrton sari ngei lâia inkhat khuriâi saria sip ripuingei mongna chôipu han ko kôm a hong, “Hong roh, male Belrite lômnu rang Moi hah nang min mu ki tih,” ni tia. <sup>10</sup> Ratha'n mi manga, male vântîrton han muol insângtak sîpa ni tuonga. Pathien kôm invân renga juong chum Khopuilien Inthieng, Jerusalem hah mi min mua <sup>11</sup> male Pathien roiinpuinân ântêrdapa. Khopuilien hah lungmantam jasper lung angin, crystal lung anghan avâra. <sup>12</sup> Kulpuilien roiinpui, insâng a dôna, mokotngei sômleunik hah vântîrtonngei sômleunik a enkol rang an oma. Mokotngei chung a han Israel jât sômleunik ngei riming ânzieka. <sup>13</sup> Akângtieng zet han mokotngei inthum aom paka: nisuotieng inthum, simtieng inthum, mârtieng inthum, nitâktieng inthum. <sup>14</sup> Khopuilien kulpui hah lungphûm sômleunik chung a sin ania, manglei chung a han Belrite tîrton sômleunik ngei riming ânzieka. <sup>15</sup> Vântîrton mi chongpuipu han khopuilien mokotngei le a kulpuingei minkhî rangin rângkachak minkhîna rotuon a dôna.

---

**21:7** 21:7: 2 Sam 7:14; Lap 89:26-27

**21:10** 21:10: Ezek 40:2

**21:12** 21:12-13: Ezek 48:30-35

16 Khopuilien hah arikil atabanga, adung akhang an êlbanga. Vântîrton han minkhîna rotuon leh khopuilien hah a minkhia: adung hah mile isângkhat raza rangnga ania, akhang le ânsâng khom adung dôr ani. 17 Vântîrton han kulpui khom a minkhi sa nôka, male ânsâng hah feet 216 ania,\* minkhîna an mang ngâi a chôi dungjûiin.† 18 A kulpui hah jasper lunga sin ania, male khopuilien hah rângkachak ânthârlaka sin ania, lîm-en dôra vârliei ani. 19 Khopuilien kulpui lungphûmngêi hah lungmantamngêi jât dadangngêi leh minvo ani. Lungphûm moton-tak hah jasper ania, inikna hah sapphire ania, inthumna hah agate ania, minlina hah emerald ania, 20 rangngana hah onyks ania, urukna hah carnelien ania, sarina hah kuartz eng ania, irietna hah beryl ania, ikuona hah topaz ania, sômna hah chalcedony ania, sômleikhatna hah turkuoise ania, sômleinikna hah amethyst ani. 21 Mokot sômleinik ngei hah lungintêrngêi sômleinik an nia; mokot zet hah lungintêr inkhata sin chit an ni. Khopuilien lamlien hah rângkachak ânthârlaka sin ania, lîm-en eninlen-patthei anghan ani.

22 Khopuilien sâng han biekin reng mu ma unga, Pumapa Pathien Râtinchung le Belrite hih biekin an ni sikin. 23 Khopuilien chungâ

---

**21:15** 21:15: Ezek 40:3 \* **21:17** 21:17: ânsâng; aninônchu abit. † **21:17** 21:17: Archang 16 le 17 Greek abupuiin ati chu "12,000 furlong" male "144 cubits" maha neinun imini aluttie aninônchu aomtie mintêkna adôn anithei. **21:18** 21:18-21: Isa 54:11,12

êlminvâr rangin nisa le thâ nâng khâi maka, Pathien roiinpuinân a êlminvâr ngâi sikin, le Belrite hih a châti ani. <sup>24</sup> Rammuola mingei hah avâra han lôn an ta, male pilchunga rêngngei an roiinpuinangei hong chôi lût an tih. <sup>25</sup> Khopuilien mokotngei hah sântin mo-ongin om a ta; khârin om tet noni ngei, mahan jân aom khâiloi rang sikin. <sup>26</sup> Khopuilien sûnga han namtinngiei roiinpuina le neinunsampâr hong chôi lût nîng atih. <sup>27</sup> Aniatachu neinun inthiengloi ngei, tukhom inzakpuiom sin thongei le milak thongei chu khopuilien sûnga han ite lûtpui thei no ni ngei. Belrite ringna lekhabua an rimingngei mizieka ompu ngei vai kêng ma khopuilien han an lût thei rang ani.

## 22

<sup>1</sup> Vântîrton han ringna tuidung khom mi min mu sa, crystal anga ântêrdap, le Pathien le Belrite rêngsukmun renga juong luong <sup>2</sup> male khopui lamlien alâitaka aluonga. Tuidung pang kângnik han ringna thingkung aoma, thâ tin vêlkhat, a kuma voi sômleinik ânra ngâi aoma; male abuongei hah namtinngiei damna rang ani. <sup>3</sup> Khopuilien sûnga han Pathien khomâksâmna nuoia aom ite man nikhâi no nih.

Pathien le Belrite rêngsukmun hah khopuilien sûnga han om a ta, male a tîrlâmngiei han ama chubaimûk an tih. <sup>4</sup> A mâi mûng an ta, male an

---

**21:23** 21:23: Isa 60:19,20      **21:24** 21:24: Isa 60:3      **21:25**  
 21:25-26: Isa 60:11      **21:27** 21:27: Isa 52:1; Ezek 44:9      **22:1**  
 22:1: Ezek 47:1; Zak 14:8      **22:2** 22:2: Aph 2:9      **22:3** 22:3: Zak  
 14:11

machalngei han a riming inziek atih. <sup>5</sup> Jân om khâi nonia, male châtingei aninônchu nisavâr khom nâng khâi noni ngei, Pumapa Pathien hah an vâi nîng a ta, male tuonsôt tuonsôtin rêngngei anghan roijêk an tih zoi.

*Jisua juong rang roi*

<sup>6</sup> Hanchu vântîrton han ko kôm, “Hi chongngei hih adika male iem thei ani. Male Pumapa Pathien, dêipungei kôma ama Ratha pêkpu han neinun hong tung lai ngêt rang ngei hah a tîrlâmngei kôm min mu rangin a vântîrton a tîr ani,” a tia.

<sup>7</sup> Jisua'n, “Rangâi roh! Ku juong lai rang kêng ani zoi! Hi lekhabua dêipu leiti chongngei jômpu ngei chu satvur an ni!” a tia.

<sup>8</sup> Keima, John, hin hi neinunngei murdi rietpu le amupu ki ni. Male mangei hah ki rieta, ku mu suole han, ma neinunngei mi min mupu vântîrton ke bula han kêi boka chubaimûk rang ko thoa. <sup>9</sup> Hannirese ama han ko kôm, “Ma anghan tho no roh! Keima khom nangma leh na lâibungngei dêipungei le hi lekhabu sînga chongngei jômpu ngei murdi tîrlâm champui kêng ki ni. Pathien chubaimûk roh!” a tia.

<sup>10</sup> Male ama han ko kôm, “Hi lekhabu sînga dêipu leiti chongngei hih ipin dar no roh, hingei murdi hong tungna rang zora hih anâi zoi sikin, a tia. <sup>11</sup> Tukhom mi saloi chu asaloi tho bang ngêt a ta, male tukhom mi porinche chu porinchen om bang ngêt a ta; tukhom mi sa chu asa sin



bang ngêť a ta, male tukhom mi inthieng chu inthiengin om bang ngêť atih.”

<sup>12</sup> Jisua'n, “Rangâi roh! Ku juong lai rang kêng ani zoi! Mitin an sintho dungjûia pêk ngei chit rangin ka râisânmanngai juong chôi ki tih, a tia. <sup>13</sup> Keima amotontak le anûktak, aputna le amongna ki ni.”

<sup>14</sup> Ringna thingkung renga theimara an sâk theina rang le mokotngai renga khopuilien sûnga an lût theina ranga an puonngai rusûk minsâipu ngei chu satvur an ni. <sup>15</sup> Aniatachu khopuilien pêntieng han chu uingai le dôitheingai, inditnasaloi thongai le mithatngai, mirmil biekngai le chongngai le sinthoa milak thopungei hah om an tih.

<sup>16</sup> “Keima, Jisua'n, hi neinunngai hih koiindangngai nin kôma phuông rangin ka vântûrton ku juongtûr ani. Keima David insûngkuo le a richisuonpâr renga; Keima jîng sikhovâr vârtak ki ni.”

<sup>17</sup> Ratha le Moi ngei han, “Hong roh!” an tia.

Hima hih ariet ngei murdi'n, “Hong roh!” ti sa ngêť rese ngei.

A tuiinrâl ngei murdi; hong roi, a nuom ngei murdi'n ringna tui hi amanboiin hong nêk rese ngei.

### *Chongkhârna*

---

**22:11** 22:11; Dan 12:10      **22:12** 22:12; Isa 40:10; 62:11; Lap 28:4; Jer 17:10      **22:13** 22:13; Chph 1:8,17; 2:8; Isa 44:6; 48:12

**22:14** 22:14; Aph 2:9; 3:22      **22:16** 22:16; Isa 11:1,10      **22:17** 22:17; Isa 55:1

18 Keima, John, tukhom hi lekhabua dêipu leiti chongngei ariet ngei chu inngartakin inningna ki min riet ngei: tumakhatin hi chongngei hih an bôkin chu amapa aninônchu amanu hah hi lekhabua misîra om dûktongnagei hih Pathien'n bôk pe ngei atih. 19 Male tukhom hi lekhabu sûnga dêipu leiti chongngei an paiin chu hi lekhabua misîra om an changrangtum ringna thingkunga theimara le Khopuilien Inthieng renga hah Pathien'n lâkpai pe ngei atih.

20 Hi minrietna pêkpu hin, "Ani tatak! Ku juong lai rang kêng ani zoi!" a ti.

Ni rese. Juong ta roh, Pumapa Jisua!

21 Pumapa Jisua moroina hah mitin kôm om rese, Amen.\*

---

**22:18** 22:18-19; Bal 4:2; 12:32 \* **22:21** 22:21: mitinin; miziek senkhatin chu Pathien mingei; adangngei chu Pathien mingei nâm tiin an dôn.

**Pathien Lekhabu Inthieng Chongtung Thar  
The New Testament in the Sakachep language of  
India: first Bible translation**

copyright © 2017 The Word for the World International

Language: Sakechep (Sakachep)

Contributor: The Word for the World Southeast Asia

**Pathien Lekhabu Inthieng Chongtung Thar**

Sakachep New Testament

The Word For The World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-14

---

PDF generated using Haiola and XeLaTeX on 22 Feb 2024 from source files dated 15 Apr 2023

2293c4a5-46d6-5769-ab81-b9a249d9205a